

松江府志



|     |   |   |   |
|-----|---|---|---|
| 漢書門 |   |   |   |
| 二   | 三 | 五 | 三 |
| 冊   | 函 | 號 | 類 |

|      |   |   |   |
|------|---|---|---|
| 內閣文庫 |   |   |   |
| 九    | 二 | 五 | 漢 |
| 冊    | 冊 | 號 | 書 |

|      |     |      |  |
|------|-----|------|--|
| 內閣文庫 |     |      |  |
| 番號   | 漢   | 2353 |  |
| 冊數   | 24  | (12) |  |
| 函號   | 292 | 17   |  |

廿之二



松江府志卷之二十

學校下

華亭縣學

淺草文庫

藏書印

同治

華亭縣學在府西南徐家橋之東邑人徐進義塾也學始建於宋元祐中在今府學後玉帶河之陽尊賢坊內即今

射圃魁星樓地端平間遷於河南以其址為閱武亭及改

升府學復建縣學於舊址按楊維禎記縣學在燕居之所則閱武嘗為燕居周伯琦府學

記十九年作燕居堂於學北不言舊為閱武

元至大初知縣劉慶作夫子廟

延祐中知縣張國英作講堂

至正中知縣楚恭張德昭相繼繕治學制粗備

至正九年重修學記畧 華亭縣學在府治東南二百步宋端平縣令楊公瑾之所開拓堂殿齋舍廊廡庖廚具焉至國朝縣陞松江府學亦陞府學土田儒籍皆隸之縣復立頰宮于府庠北舊燕居之所也至大初劉慶來典邑始構大成殿并儀門兩廡延祐己未令張國英復構講堂及設祭器至正癸未縣令楚恭修櫺星門繚以崇墉而學之規稍完歷年未久而棟宇有弗支者其址尚湫隘至正九年春縣長養安海涯縣令張德昭命教諭王倫謀更作之乃告丞簿帖木兒不花兀都馬沙俾諭邑士于是澱山謝庭蘭與其姪晉併力從事閱三月而告成大成殿增闢後室殿之側翎學官廨又前後築石塘以捍水凡柱石之欹傾者正之椽櫓之朽蠹者易之丹青之漫漶者飾之既竣事徵記于余余嘗悼井牧間師之廢後之為治者亦難矣貧富相縣雖使臯陶持刑不能禁強不侮弱倫理弗明雖使姬旦制禮不能革賤不僭貴此非教何賴哉而守令視學校如傳舍令無實政師無實教士無實學而望風俗之美人才之興不亦難乎華亭卑下沮洳民性輕戾而媮靡邑侯以興

學校為先務師儒以作成士類為急功邑之人上又能不負循令長賢師儒教養為實學吾見復舊時文物之盛且使他邑於是乎勸化令之得治名者不在是乎楊維禎記

十六年丙申學燬於兵以其地為府學射圃

明洪武三年庚戌知縣馮榮奉詔立學始即徐進義塾為之

七年甲寅知縣周朗作大成殿知縣祝子憲廓新學舍邑

人徐彥裕董其事作明倫觀頤二堂博文約禮二齋學制

始備九年丙辰知縣朱直作知本堂

洪武十年建新學記畧 華亭舊學在今府治之南自元至元間縣陞為府學亦隸焉由是改燕居堂為縣學後厄于兵燹今之學則徐氏義塾也初縣人徐進始創于縣南割私田一萬畝有奇招延明師以淑里子弟西

松江府志 卷之二十一  
建大成殿堂廡戟門春秋祀先聖先師至我明始更爲  
縣學及教諭東宗癸訓導胡鉉金聲朱武李象賢相繼  
至思作新未就洪武七年春郡守王公文貞祇謁廟庭  
退而延儒師講經義諸生升揖拜肩摩踵躡不容周旋  
乃與知縣祝子憲議廓而新之會部符下郡縣以民屋  
之籍官者修葺廟學進之子彥裕聞而請曰此吾先子  
志也敢不身任其責郡守嘉而義之于是拓學東地重  
建明倫堂二間夾以翼室創東西齋重門兩廡繚以周  
垣高爽明塏輪奐翬飛論講有堂肄業有齋藏修有室  
習射之宮庖湍之廬靡不畢具未幾知縣朱直來視事  
學校之事知無不爲作育後進增光前人由是率亭之  
學遂甲于他縣矣予謂曩年學廩充溢悉爲游食所蠹  
職教者鮮有易一椽加一甍者今以枵然之宮而氣象  
一新是雖賢守令之所舉倡徐氏父子之所經營其亦  
斯文氣運之所關與他日教成德立蒸髦彙升邇之事  
父遠之事君以行其所學無負聖賢垂訓則亦無負聖  
朝樂育人材之意

云永嘉曹睿記

洪武十一年知本堂記畧 暇之友曹公仲博典教率  
亭深患學者從事於文辭章句之末及取朱子福州經

史閣記中語名其燕居之堂曰知本以示警焉般竊觀  
朱子講論問辨反而求之不外一心彼博文多識之士  
纏繞文字賊害其本心謂之善學可乎師弟子登斯堂  
而游焉息焉從容涵泳而有得焉則其所至何可量哉  
堂作于洪武九年實知縣朱侯建教官廨之中一室也  
侯廬陵人諱直字子良松江府儒學訓導河東王般記

### 二十年丁卯大成殿壞御史黃克庸新之

洪武二十年重修殿記畧 率亭學在府治南元末毀  
于兵今學則徐氏義塾也洪武改元我國家平浙西二  
年詔興天下學校三年知縣馮榮始遷于此而大成殿  
庫隘弗稱七年知縣周朗始命邑民鄒德方徐均德更  
新之不數年而圯今年春適監察御史臨川黃公克庸  
以雜事至郡展禮殿下顧而歎曰茲非吾之責耶未幾  
知府雲南何賜知縣劉均俊相繼而至各捐已俸以倡  
而鄉之好義者張示周思誠等亦以貲來助經始于四  
月訖工于閏六月諸生以其成之不易也俾凱記之凱  
時以訓導攝學事竊惟有天下者必設學校必崇廟庭  
然後人心有所係屬如百工之居肆則志不遷而事可  
成也何向之爲政者以獄訟徵科爲急風化所自出漫

不加省遂致零落頽敗是可歎也自今風紀之司臨蒞於上賢有司倡率于下輪焉奐焉睹茲清廟肅瞻聖容其必有得于觀感之間而興起焉他日賢才輩出使江海之上藹然有洙泗之風無負國家教養之意則自今日始也訓導袁凱記

永樂十五年丙申學舍壞於風雨丁酉知縣高宮重修人邑

張廷昱助貲宣力居多教諭章魯先記記今不存

宣德元年丙午巡撫大理寺卿胡槩改作明倫堂復為堂

於後日進修教諭林輔董其役同知王源記記今不存

正統四年己未推官楊政重建大成殿新戟門及兩廡

正統四年重修大成殿記畧 洪武戊辰予初典教率亭釋菜之日周覽學官自殿宇堂齋以至門廡庖廩之所規制整肅締構完固仰瞻聖殿文采煥然蓋前訓導李處仁所作袁凱為之記予深有賴焉居六年以內艱

去固歸然也自初建立距今五十餘年海濱多颶風雷雨震蕩拔木飄瓦由是昔之巋然者敝棟橈梁腐楠墜檐彩繪漫漶丹漆蒙翳典教事楊益陳賓胡穗深以為憂廬陵楊君惟教由監察御史來典松江府刑獄慨然有志更作乃謀諸郡守趙君子聽訟之際簡閱平民情有可矜法有所疑悉從寬貸俾就于贖積二年凡得材木輒甃若干及工人之費百需之具充乎其有餘遂度材庀工經始于正統二年冬之仲月落成于四年十月殿之崇高深廣規摹改觀繼今從游於斯者于于然雍雍然肅瞻聖容有所觀感退而致力端其趨向去枝葉以求本根明體適用振聲華於當世流惠澤于無窮庶幾不負朝廷教育之恩守令作興之意惟教奉揚之美予雖衰老與有光榮諸君子勗之國子祭酒太子賓客致仕豫章胡儼記

八年癸亥知縣李希容建觀德亭教諭程完義訓導胡穗

趙建相其役

成化八年壬辰知縣戴冕大修學宮冕時修殿廊飾聖賢像重作明倫堂及齋

門廡撤觀頤堂而徙觀德亭於其後新教官宅增修號舍  
二十有五間學三面緣河皆甃以石爲右闌于其東南西  
跨河爲亭曰希顏曰志尹立  
科舉題名于儀門且爲之記

成化九年修改廟學記畧 吾華亭在唐宋爲壯縣洪  
武二年始遷今學正統間推官吉水楊侯政增葺正殿  
兩廡而堂齋門道猶仍舊貫日就朽腐師生不升立者  
有年矣成化五年春戴侯來知縣事遂日節廩稍公用  
之餘重修殿廡及聖賢像講堂編小廓而增高兩齋翼  
然門廊跂然觀德堂舊在堂東今改于殿側公解二在  
學外橋南今鼎立于中門之左其蒙翳甃以甌甃爲  
岸爲欄爲兩橋咸以石而亭于橋上左曰希顏右曰志  
尹規模闕壯金碧輝飛于是學諭陳章司訓陸顯袁充  
胥請爲記夫三代而上政教本于君身故治隆而俗美  
其後以六事責諸守令而以興學爲先學誠風化之源  
人才所自出也文翁守蜀郡韋冊令萬年皆以此而得  
稱循于史傳夫華亭遷學已踰百禩而久安於庫陋一  
旦成於戴侯不謀於上不煩於民煥然宏構傑出于羣  
望之表爲師者講授有地爲弟子者樂育其間去凡近  
以游高明風俗不日厚而人材不日盛乎侯名冕字廷

章巴縣人舉四川癸酉  
解試第一邑人錢溥記

弘治三年庚戌知縣汪宣增拓學宮爲梁於泮池學制大

備宣因戴冕之舊制而增葺之撤興賢育才二坊而建以  
石于中爲石梁跨河而南爲泮宮坊坊之南爲亭重簷  
八觚顏之曰聚奎學之科貢士則題名其上其南爲泮池  
左右爲外號繚以周垣環植檜栢白遷學以來增拓凡六  
至冕而規制始宏至宣而大備泮池外積水五泓聚奎亭  
成有日者過之曰此五星象也數既合矣必有應之者

七年甲寅知府陳讓建崇文閣於講堂後其址故進修堂也

弘治七年建崇文閣記畧 華亭爲學百三十祀歷五  
增葺拓而愈宏建而愈備凡學制宜罔或漏惟時填殿  
壯觀鍾靈延秀以昭宣天子之文光登崇聖賢之教典  
者則固不可無喬聳峙峙者于其間矣于是教諭盧龍  
楊君濟民圖閣焉會監察御史劉君宗敬來視學濟民  
白之御史御史是而營之工興未幾而代去而郡守陳  
侯遜之至益力助之復躬蒞之以程其情勤閣用以成  
是爲甲寅冬十二月也地爲進修堂舊基增築者凡五

十尺前堂後河左息右射高五十有六尺廣如其高而多十尺其深三分其廣而得一其為楹三其為簷以層計者如其楹之數為工五千餘又踰年丹堊甃楹悉具侯落而命之曰崇文文之時義大矣哉觀乎人文以化成天下五帝是已憂深思遠經緯集成乎其間以備萬世法程者禹湯文武周公孔子是已作而延之承而宣之昌氣峻志聯翩雜沓率先天下以進輔天文人文之化以軼乎皇帝王聖者殆有基于是哉錢福記

八年乙卯知府劉琬闢鴻達街

琬遷射圃中闢廣術徹於橫街曰鴻達街於是弘敞

壯麗甲于他邑矣

嘉靖元年壬午知縣聶豹重修學宮

嘉靖八年修學記畧 雙江先生永豐聶公知華亭縣之二年乃修學宮葺故創新具有成績天子徵公為御史又晉公作伯于蘇而于時尚未有刻石已丑春姚江陳君徠典學事階為言公作學勒導士懇有古循吏之風君比至肅瞻廟宇周視黌舍博詢黃耆謂雙江公之功前此未有也今年春階以謫歸請曰子昔言雙江公

作學之勤而導士之懇也徠今得覩而考焉修大成殿以崇本修明倫堂以崇教作名宦鄉賢祠以端軌作講堂作號樓以居業信哉知雙江公者莫如子階昔為諸生受業公之門及官翰林嘗欲為公作記而公以書止曰是有司之職不足以示今傳後惟仁義忠孝吾與子朝夕所議論者苟無負吾言則所以為惠也階拜而識之不敢忘夫仁義忠孝公之為政于茲也亦其所以作學而導士者也公名豹字文蔚修學之歲為嘉靖改元壬午翰林編修徐階記

萬曆五年丁丑知府賈待問重修廟學

萬曆五年重修廟學記畧 正德間貞襄聶公蒞仕華亭以理學教多士顧瞻學宮喟然言曰夫士不知學士之恥也學有官而不修吏之責也編視其棟宇楹楹之傾圯者葺之丹碧髹漆之漫滅者新之又為闢射圃建名宦鄉賢祠增置號舍俾士之力學者屛之常是時絃誦之聲禮讓之俗藹然與鄉魯同其後倭夷寇海上有司日殫力于兵食之務勢不暇顧所謂學宮而教亦日以廢墜子罷政歸未嘗不與知舊追思聶公恨未有能

繼焉者去年秋貴陽孫君枝華以鄉進士高等來為邑  
 博士始率其僚朱君印梁君夢昂具當修狀于郡守賈  
 侯待問毅然在曰是固在我時二守關西杜君鴻司憲  
 洧川范君守已與侯同志而相繼署邑事遂經度其費  
 之所出役之所宜先後出贖金修焉工且半賈侯遷曾  
 侯如春至二守仁和鄭君復亨與杜君同時署郡邑相  
 謂曰學之修未舉也吾兩人者適署其篆責其可辭策  
 吏課工為之益力別駕廣右蔣君守成陽曲雷君應志  
 又各以其職相勉殿廡堂齋嚴整華采舉無異聶公時  
 於是三博士以記來請予告之曰夫學之有官吾徒所  
 以崇孔子而祀之又相與習詩書禮樂于其中者也顧  
 或忽而不修使無以享俎豆之奉攻講誦之業其待師  
 與友如是則于民之居可知矣政教始于學學之修視  
 厨傳筐篚之費曾不能百一也然而彼為之而此不為  
 則于民之事可知矣民將何賴于吏國亦何資于大夫  
 以治哉士幸生于斯學于斯又幸有諸君子為之修學  
 以示風勵顧于聖人之學不可知  
 所事哉因為記大學士徐階記

二十年壬辰知府詹思虞華亭知縣項應祥重修廟學

萬曆十九年重修縣學記畧 華亭之有學遡自國初  
 至孝廟庚戌增拓者六殿堂齋廡祠宇以次咸備南跨  
 河為梁梁之南為坊為亭為池池之南為泓者五以象  
 五星則邑侯汪公始開大之逮郡守陳公創閣崇文於  
 是學之規制形勢始甲東南名卿碩彥由之而起者炳  
 曜後先自余隸諸生居業于茲歷仕進以暨謝歸越歲  
 數十斯學之尋敝尋新者亦無慮數四乃其湮敝之極  
 莫甚于世廟季年直倭奴內訌守土者迫疆事未暇議  
 復葢迄于今幾四十年萬曆壬辰平昌項侯應祥以奏  
 計還首議及之為請於郡侯詹公裁酌奇贏度費所從  
 給上之兩臺既報可乃慎簡董事者鳩工庀材諏日經  
 始不三月而工告成宮墻殿閣坊亭齋舍煥然一新後  
 於舊觀復即其南濬吳源杜旁徑累土為山就其南為  
 溝以聚風氣諸所興作因舊鼎新一一出侯經畫侯為  
 政持大體以循良著稱尤加意學校其敏于事而不煩  
 類若此是舉也開府劉公應麒直指甘公士价郡伯詹  
 公思虞學博徐君汝晉司君表董其事者則監生顧正  
 倫以其先大叅中立之發跡于茲也而拮据從事不愛  
 餘力法當備書禮  
 部尚書陸樹聲記



天啟間知縣徐尚勳重修學宮

天啟 年修學記畧 西吳徐公涖治吾邑下車以後  
 尤加意庠序凡絃歌之室俎豆之宮以次鼎新捐餒之  
 外悉覈逋役金矢之入俾歸簿正僇功不日輪奐告輝  
 於是博士凌君偕其僚徐君莫君龔君石請記余竊有慕  
 於古循吏之治未有不以經術飾政術者也周禮大司  
 徒以六職安民其最重曰聯師儒學記又曰安其學而  
 親其師樂其友而信其道故文翁之為蜀郡也修起學  
 宮以博士業歸者遷為右職化比齊魯以至鮑德之為  
 南陽范甯之令餘杭李栖筠之為毘陵常袞之觀察八  
 閩數君子者或當揆文厭法之日或當黜兵樂武之時  
 而能從容講求奮身砥柱卒使聖緒載衍憲矩大弘後  
 世治先武健汲汲務隳赫之名草菅其民而蝟螿其士  
 講堂之前曾不足迴其一顧而望士風之醇士氣之振  
 也難矣公不下堂而明徹葭屋不傷忍而利剗大觚剪  
 棘而滋蘭芳斬艾而開李徑以廉生威故威不褻以仁  
 生惠故惠不私無論鄉邑之秀晞景光赴洪印即四遐  
 之陬谷居澤聚家若珮以鴈玉人若曉以詩書佻手輕  
 衿為之一變是能養民而兼敷教者也是以醇儒為循

吏者也非徧智專器而弘博知務大臣之度也公為巨  
 棟而一時師儒如凌君輩丹楹青牘以次收用黼黻既  
 具雲漢為昭豈惟峰泖之靈磅礴暢發哉徐公名尚勳  
 德清人凌君夢賜鹽城人徐君弘祖吉水人莫君天瑞  
 長沙人光祿寺  
 卿陸彥章記

崇禎元年戊辰知縣鄭友玄重修學宮

崇禎元年修學記畧 國家稽古右文顧俊登賢以黼  
 黻到理內隆國學而外屬在郡邑並重泮宮吾郡襟江  
 抱湖枕峯展海為留京三輔股肱地而華亭尤號稱巖  
 鉅士挾一經起里選自效于天子之廷者往往垂芬竹  
 帛策名釜鍾入明以來於斯為盛矣乃每當三歲一上  
 賢書逢年之雋歌鹿鳴而與計階者廣至數子而盈寡  
 或一夔而足豈徒世隆世替氣數適然亦崇儒重士表  
 章而作新之其精意殊也邑侯鄭公執要惇本尤加意  
 學宮遂出飲水之俸大加葺治首事郡學輪奐一新更  
 嗣修邑庠庀材鳩工百廢具舉公復身自董成而言言  
 翼翼廣術華榱粲然為百年未有之觀矣公廉操介節  
 如霜松雪栢孤清凜寒虛明洞物又如秦鏡當空幽微

畢照而至其尊道誼正經術則又如澄流于源而養玉於璞推行廣厲至意固可垂之無斃也昔有漢元康神爵傳多循吏而獨文翁之化蜀使蠶叢亮翳之國永耀文明為千古循績之冠况以吾邑之晶華而重以公之隆造龍飛在御吾邑士之陶淑而風雲景從者寧有既哉侯名友玄號其山湖廣京山人學博濳君玄華吳江人蔣君充恭貴州人

大學士錢龍錫記

本朝順治十二年乙未

庶公廨重建啟聖宮崇德堂

射圃 明洪武初知縣董原芳拓學東地為射圃及知縣周朗始創屋為射位後知縣祝子憲朱直相繼廣新之作觀德堂後以雨圯十一年戊午知縣蔣惠重修

洪武十一年射圃記畧 古者天子之制諸侯歲獻貢士于天子天子試之于射宮其容體比于禮其節奏比

於樂而中多者得與于祭華亭舊學燬于兵知縣董侯原芳即徐氏義塾為縣學拓學東空地為射圃正東而西向焉未幾周侯朗踵至創屋以為射位布侯棲革翻旌薦俎之屬靡不畢具既而祝侯子憲朱侯直相繼視事又擴而新之乃名之曰觀德堂于是射圃之規模為稱諸生之射始習九年大霖雨自夏四月至於秋九月垣之圯者相屬圃具廢矣今年春鄱陽蔣侯惠來宰是邑教諭曹宗儒首言及之侯乃集教官耆年考制度定疆界綿亘凡百有餘步廣如其五之一實其地若干畝白諸府准例蠲租稅于是量工命日因故堂更諸爽塏固其版築正其正鵠居無何民不擾而事集侯乃登其堂招諸生而習射焉繪為圖將刻諸石請文以記前進士曲江錢

惟善記

正統五年庚申提學御史彭勗闢射圃於學東隙地

弘治八年乙卯知縣劉琬復射圃於學之東

學田 元末學為徐進義塾凡割私田一萬畝有奇以贍

塾後塾改爲縣學田散佚不可考

明嘉靖四十五年丙寅縣人刑部侍郎徐陟助田二百七

十四畝有奇贍學

萬曆十一年癸未知縣陳秉浩置田贍學

捐公費銀五十兩置田三十六

畝九分林景陽有記

十二年邑人董晉助田贍學

計四十一畝一分三釐

二十四年丙申知縣張繼桂始以入官田贍學自後兵備

副使鄒輝知縣熊劔化知府張九德知縣章允儒巡按御

史馮英知縣鄭友玄相繼行之凡爲田六十一畝有奇

萬曆二十四年知縣張繼桂助入官絕戶田一十畝三釐二十七年又助入官軍地九畝六分七釐三十六

年蘇松兵備鄒輝助入官田四畝九分六釐五毫

三十五年知縣熊劔化助入官田一十畝七分六釐六毫

三十八年知府張九德助入官田一十畝七分專備

三烈祠春秋祭禮四十八年知縣章允儒斷助文昌

閣祭祀田六畝六分天啟元年巡按馮英助斷入官

田六畝六分七釐崇禎二年知縣鄭友玄助斷入官

地二畝四分一釐

二十六年戊戌邑人太僕寺卿林景陽助田九十八畝三

分八釐贍學

教諭李官有記

三十七年己酉邑人知府徐琳助田一百五十畝尚寶司

丞徐肇惠助田三百五十畝四分有奇贍學

馮夢禎范允臨各有記

四十一年癸丑巡撫徐民式推官吳之甲置贍學田九十

二畝有奇

巡撫徐氏式給濟墅關課鈔餘銀二百五十推官吳之  
甲署縣節省公費銀一百一十六兩七錢九分共買田  
九十二畝五分四釐  
每歲請詳撫院支銷

天啟五年邑人按察副使朱本洽助田一百畝有奇贍學

何三畏  
有記

以上田畝俱經申報督學造入查盤每年取租先儘完  
糧餘存租米賑濟貧生膏火木學公費歲終具詳支銷  
各宦祠明嘉靖初知縣聶豹始建於學宮左

明華亭縣知縣馮榮  
華亭縣知縣蔣惠

華亭縣學教諭胡儼  
華亭縣知縣楊昕

華亭縣學教諭段讓  
督學御史婁謙

督學御史章袞  
松江府知府何鰲

華亭縣學教諭程癉  
松江府推官姚唐

蘇松道兵備副使任環  
華亭縣知縣熊劍化

應天巡撫都察院右僉都御史周起元

鄉賢祠在各宦祠西明嘉靖初知縣聶豹建

明浙江錢塘縣知縣葉宗行

河南睢州知州任勉之  
國子監祭酒陳詢

淮府紀善贈太子少保刑部尚書張璠

山東右布政使夏寅  
工部營繕司主事宋瑛

南京兵部尚書贈太子太保謚莊簡張悅

南京兵部尚書贈太子太保謚莊懿張瑩

浙江按察司副使曹時中

江西南安府知府張弼刑部郎中周佩

南京禮部尚書贈太子少保謚文僖顧清

徽府左長史吳稷湖廣武岡州學正高博

戶部員外郎張昕廣西按察司副使張弘宜

江西寧都縣縣丞贈少師建極殿大學士徐黼

雲南按察使李希顏南京刑部郎中李儒

廣西按察司僉事曹閔浙江溫州府知府郁山

戶科左給事中贈光祿寺少卿楊允繩

湖廣道監察御史贈光祿寺少卿包節

南京河南道監察御史贈太僕寺少卿包孝

大理寺卿胡岳太僕寺卿沈愷

太子少保禮部尚書贈太子太保謚文簡孫承恩

少師吏部尚書建極殿大學士贈太師謚文貞徐階

南京吏部主事高士廣西提學副使周思兼

大理寺左寺丞贈浙江布政司參政馮恩

浙江右布政使莫如忠南京兵部郎中唐自化

應天府推官贈兩浙都轉鹽運使陸應寅

太子少保禮部尚書贈太子太保謚文定陸樹聲

南京兵部侍郎蔡汝賢儒官莫如爵

旌表孝子應天府通判馮行可

南京太僕寺卿林景暘

南京太僕寺卿吳炯

刑部主事封四川夔州府知府徐三重

南京工部郎中俞汝為 福建提學副使方應選

禮部右侍郎贈太子少保禮部尚書謚文恪唐文獻

山東蓬萊縣知縣贈太子太保東閣大學士錢大復

南京吏部主事陸彥楨 右春坊右諭德楊繼禮

光祿寺署丞顧王心 浙江道監察御史沈時來

社學

華亭縣社學在城隍廟東願勺亭

天順六年 御史袁愷知府李惠禮請儒士錢潤為師立華亭社學于干城隍廟東在城社學訓迪民間俊秀

以備庠序弟子員缺天順七年督學御史嚴淦又于各鄉增置社學六十處教讀六十所生徒一千一百五十二名由是閭閻莫不有學今並廢

書院 求忠書院在普照寺西

詳見壇廟志崇禎中嘗設義塾于此

置義塾記畧 古庠序之外又設義塾其法二十五家為一間中俊秀則延道德左右師訓迪之而因行射飲讀教之禮所謂無地非學無人不學也後世學校廢弛博士弟子員於有司日益親師長日益踈而暇問及義塾乎京山鄭侯初令青浦修葺青浦學宮至是清理顧氏役田其中有義學若干畝租若干石名存實亡壯飽雀鼠侯慨然力任之謀于華亭諸博士延陳茂才入求忠書院郡邑之俊秀授經其中有奇資異才者則錄其文以獻侯親加甲乙品題而寒士莫不顰首翹足欣欣向風矣嘗考華亭義塾頗多獨邵氏捐田二百十六畝有奇邵天驥創之其子彌堅成之也徐氏捐田一萬畝有奇徐進創之其子彥裕成之也今徐邵之後復有顧光祿父子而又幸鄭侯餼廩塾師以成其引掖後學之雅意非特孤寒之士有所藉以長養吹噓即後來

慷慨好善願為徐邵之續者度不自顧光祿父子而止也化民成俗大矣哉大雅詩云肆成人有德小子有造侯皆饒為之若子產能養而不能教昔人比之衆人之毋豈能望我鄭侯哉故樂而為之記郡人陳繼儒撰

義塾 邵氏義塾在胥浦鄉

元統二年義塾記 翠岩處士邵君家于華亭縣西南六十里胥浦之上遺世弗仕而志在澤物遇其鄉之人委曲纖悉一以惠利患夫去庠序之遠而其子弟無所于學乃捐私錢即所居之旁闢義塾贍以胥浦風涇仙山三鄉之田二百十六畝有奇禮名士主其席聚里中之俊秀而教育之二子彌遠彌堅克承君之志力相其事君既高壽終彌堅尋卒而彌遠亦老矣懼來者或隳其成則列其田之步畝鄉落以狀白于官示不敢有且求書石以告後人俾永勿墜予觀先王教民之法間有塾黨有庠遂有序為士者固不必常在庠序之間而朝益暮習之功必本于間塾故其詩曰攸介攸止烝我髦士三代而下禮闕學廢宋制唯藩鎮乃立學其後因執政之請而學始徧于郡縣我朝因之四方萬里莫不有學矣然為民師帥者恒迫于職務之繁况里居之遠于

州邑者欲時會于庠序而不可得非有私淑之地士何賴乎處士君誠所謂一鄉之善士而鄉之秀民賴之以為士者也君今已不可作而其嗣人能汲汲焉迂續之如君之存絃誦之聲久而愈振君父子有功斯文其善所及奚止一鄉已哉處士諱夫驥字千里彌遠字子猷彌堅字子固奉政大夫江浙等處儒學提舉黃潛撰

璜溪義塾在呂巷溪

元至元九年呂豆佐建翰林侍讀學士黃潛記良佐又常作應奎文會

附應奎文會自序 國朝設科取士以明經及古賦詔誥表策兼其才者亦難矣十一科之文自延祐跡至正末其得失已大相遠嗚呼可獨咎天下之士哉良佐生文明時竊慕鄉舉里選之盛輒于大比之際翔立應奎文會邑大夫唐公世英張公彥英明勸于上移以公牒聘海內知名士主文評者會稽楊公廉夫公又舉同評者雲間陸公宅之東南之士以文投者七百餘卷中程者四十卷蓋楊公蚤登高科其文力追西漢盛唐之作而山林學者無不欲列名于其門故視他會為獨盛不然士之懷奇負氣不可以爵祿誘者甘于自閔其學况銖金尺幣所能致哉今所選高者經正而文賦奇而法詔誥章表各通其體策皆貫穿古今而有經世之畧者

也誠足為後代之繩尺已選中之文因錄諸梓以傳不朽至正十年七月序魁其選者廣信尹希顏也

谷州義塾在澱河東

郡人謝伯禮建元楊維禎有記 自社學至此皆廢

附文昌祠

明洪武二十一年丁卯御史黃克庸建文昌

祠於戟門之右萬曆四十六年戊午知縣章允儒重建

重建文昌閣記畧 邑庠故有文昌祠洪武間侍御黃公克庸所建歷久傾頽像寄云宮庠之與隅故有嘉蔬亭址萬曆甲辰邑諸生請于當事濬渠遂益高亭址擬構傑閣祀文昌而未果戊午邑侯豫章章公慨然為已任躬自相度捐俸數百金而教諭杜公司訓湯公蔡公亦以俸助落成于庚申秋仲為閣三重高八尋又置祭田隸之學俾給祀事屬龍錫為記余聞文昌實佐魁斗土人科第故自經明行修然譬之力田不廢禳祝今而神無所憫矣適學使者方增廣厲之額我邑人士斐然而荷神庥拔茅連茹何疑哉魯僖作頌為修泮宮章侯能建非常之役復百年之墜以加惠士其音昭昭矣神之聽之介爾景福豈有艾哉史官錢龍錫記

附陳劉二公去思碑畧

往余守靈波與錢塘密壤

守臨江與南昌密壤以是稔知錢塘陳貞亭南昌劉溪二先生並世家高賢博學嗜古而不偶于時貞亭僅領鄉薦東溪僅以貢需次銓曹人多為二先生惜之二先生裕如也無何來教吾華貞亭為之長東溪貳焉肫肫以古道相先貞亭外嚴毅而無城府東溪性和緩而中有衡尺故其為教也皆能端化 狃頽習斥浮靡義外之饋一切謝絕士有貧者顧捐 以資不逮士以是翕然從風貞亭既轉國學助教東溪亦轉荆門學正今已五年于茲諸生思之久而不忘詎有之不精不誠不足以動人洵二先生之謂矣是其為思豈惟自今雖千百世其一日也隆慶元年太僕寺卿沈愷記

縣學公占基地共三十五畝三分八毫俱免科糧

華亭縣四十保一區南內二畝天字圩八十四號二十三畝六分八釐九毫係學宮衙宇射圃等 八十五號三畝三分一毫係泮宮聚奎亭七星潭 八十九號八畝三分九毫係三台山

婁縣學





始立學本道廉訪副使商公繼顯分臬松江改撥府學田七頃而荒蕪者二頃祭器書籍殿堂齋序咸闕焉至大庚戌僉廉訪事吳公彥升巡按是邑慨學宮之隘陋思所以新之邑先達中順大夫遙授兩浙都轉運鹽使瞿公霆發買民田五百畝有奇入之學宮又捐貲以助建學之費乃相基址得官地十五畝于縣之西俾同知府事帖木兒海牙董其役竊觀易之頤象曰頤貞吉養正則吉也觀頤觀其所養也自求口實觀其自養也禮運曰治國不以禮猶無耜而耕也而今而後必修禮以耕必陳義以種必講學以耨必本仁以聚必播樂以安母荒厥志母餒其氣此自養之說也內外交相養其學不懋矣哉前浙東海右道肅政廉訪副使臧夢解記

延祐元年甲寅縣丞王珪改建學於縣治東

學在益慶橋東即今學也

凡更一丞三尹而學乃大成學之勝槩有天光雲影池中亭酸窩古井蕉石堂前有古松梧竹無數今池尚存餘皆廢

至正十一年辛卯縣丞張議重作廟門齋舍知縣何英作

上海縣學

上海縣學在縣治東本上海鎮學也初在長生橋東北宋咸淳中鎮人唐時措市韓氏屋立文昌宮請于監鎮董楷作古修堂為諸生肄習所元至元二十八年辛卯鎮升為縣三十一年甲午知縣周汝楫乃更為縣學繕葺未竟明年廉訪僉事朱思誠以按部至委邑人萬戶費拱辰成之

元貞元年建學記 邑有學始于漢至魏令縣五百戶置校官置鄉學宋置縣學蓋取古者鄭人游鄉校百里皆有師之遺意也上海舊為鎮嘗像先聖先師于梓潼祠又有古修堂為諸生肄習之地至元辛卯割華亭東北五鄉立縣甲午榜縣學縣尹周汝楫洎教諭諸執事方營建未遑聖上龍飛首下崇儒之詔明年改元浙西廉訪僉司朱君思誠按行是邑適與余偕至越二月朔率其屬拜宣聖殿時縣僚迫以田糧四出皆不得與邑

事因委鄉費萬夫長費拱辰修葺之乃飾正殿完講堂  
買鄰地而起齋舍不三月沈沈翼翼如至鄒魯之間游  
洙泗之上矣上洋襟江帶海號東南壯縣今廟學一新  
將見聞絃誦之音觀鄉飲酒之儀化番商為縫掖其或  
禮義不行人材不出獄訟不稀盜賊不息余弗信已既  
畢工書與學之由俾刺石若夫棟宇之未備器皿之未  
全圖像之未足尚有望于邑之諸君  
松江府知府兼勸農事張之翰記


### 大德中松江判官張紀縣丞范天楨增拓學宮於是學制

#### 始備

大德九年修學記畧 上海縣介在海濱商賈百貨所  
輸會昔治以鎮至元二十八年始陞為縣惟時官署吏  
舍往往更置未暇興學海道運糧萬戶費侯拱辰念里  
居于是而學弗立顧舊有梓潼祠非有功茲土乃改為  
學材章夫役器用之資咸出費氏侯歿而學浸壞大德  
六年夏松江判官張君紀始議增修縣丞范君天楨欣  
然以為已任首捐俸錢為眾倡作軒于殿外又新夫子  
像繪先賢兩廡為外門三學門一朱扉儀戟舉以法階

### 明倫堂於廟左

至正十一年修學記畧 縣之有學其來尚矣歲久弗  
葺齋舍隳圯師生靡寧監縣忠武兀奴罕公縣侯承務  
張議公始至茲邑瞻顧咨嗟大懼學政之不修教基之  
廢墜也曰惟政本莫先于教碎雍泮宮載在雅頌古人  
為治蓋自有本哉于是捐俸以倡募佐姚良能阿德彌  
實謀畫贊襄邑士費雄等咸輸金助役爰命教諭于達  
慎歲租之入節廩稍之費鳩工買材凡椽棟杓柱蝨腐  
椽折者易之齋廬門廡之未建者完之瓦比甃甃上安  
下窻戶牖洞達丹堊炳煥重簷翼翔廣庭砥平瞻宮牆  
足起其敬肅之心居齋舍足安其講習之志壯麗宏偉  
中式度程凡創造櫺星門大成殿門齋舍二十餘楹垣  
墻則益其卑而高焉廊廡則撤其故而新焉講堂則因  
其舊而甃繳焉上人覺玄者感誠嚮化舍田蕩六百畝  
有奇輸券于學歲租之入永嗣修葺之費俾已成之功  
保全于弗朽上人異教殊科嚮慕若此宜乎化行俗美  
閭里巷社絃歌聲聞矣翰林侍講學士中奉大夫同修  
國史知經筵  
事黃潛記



明洪武中同知王文貞修復學宮

洪武十一年圖籍記畧 學校天下之本也舍羸秦而下雖六朝五代喪亂之極猶不之弛知為之本也故天下之治則守綱常循禮樂遵制度而耻為違道設有不幸亦全節守義代不乏人所謂教道之結于人心也上海為縣自至元二十八年始其有學則自三十一年首創之者縣人宣慰費公拱辰因而隆之者判官張侯紀縣丞范侯天禎也垣而周之通濶泮水復古學宮之制而廩士養老者縣尹辛侯思仁也更大基址崇廣殿宇加敞廡序裒贍其田糧增置生員者僉憲吳侯彥升縣丞王侯珪運使縣人瞿霆發及縣尹張侯如砥也其重修者縣丞張侯議也創教諭之廳開講習之堂糾其德望之士而以規以勸者縣尹劉侯文大也老者有所遵也少者有所造也學者盛而庠舍弗容也別建明倫堂及東西齋者縣尹何侯緝也非禮無以將其敬也非樂無以達其用也置禮器雅樂籩豆壘爵者縣尹蘇侯宗瑞也嗚呼學其至于大成矣夫物有盛則有衰有隆則有替基侵于強民類私于鄰交舉之聚之復而完之者其今郡同知王侯文貞也不有作者誰其繼之繼將不

及作亦何為若王侯者可謂善繼其作矣又慮夫其所舉者或覆聚者或散復者或失畫之圖紀之籍俾為方來者守于是勒之貞石以永無窮顧或謨

正統四年己未提學御史彭勗巡按御史蕭啓命知縣張

禎大作學宮

正統五年修學記畧 今天子蒞祚之初特命公卿大臣慎選學行堪為後學儀表者一十三人授以風紀之職分處天下各賜璽書俾各遵守奉行期得賢才以致治乃少傅楊公首舉吉之永豐彭公祖期為監察御史專督畿內諸學正統元年九月駐車松之上海邑庠謁聖之餘觀諸廢墜曰是誠典茲土者之過也維時郡倅清河潘侯俊建陽滕侯康邑令東臯張侯禎丞浦城蔣侯文凱等祗承恐後同鳩材僱工而經營焉若殿廡齋宇明倫堂門則撤而新之文昌祠門明倫後堂射亭生舍則特建之戟門饌堂則改朽易堅以及祭祀器物亦皆一新越四年冬公復按臨瞻茲棟宇翬飛百爾且備喜溢于色顧研記之垂勸後來砥礪後進由是賢才

彬彬而出無負少傳公所薦足荷聖君付託之重而為後學儀表矣仲秋既望訓導徐研記

正統八年癸亥颶風壞學舍巡按御史鄭顥復修好義者

出私錢助之學舍復新

時陸友常建文廟陸大本新橋星門學門金彥英立饌堂完教諭宅

曹永常完戟門

天順中知縣李蔡改建講堂增兩齋

左曰育英右曰致道

成化二十年甲辰知縣劉琬作尊經閣於明倫堂北

尊經閣記 成化二十年上海縣儒學尊經閣成是閣也邑宰宜春劉侯治縣又明年百度咸舉庠舍一新又議地于明倫堂北建閣數楹以貯六經聖朝御製諸書及百家子史無不具在而獨以尊經名經以載道也劉侯知經學所當重乃倡斯閣以尊崇之俾諸士子誦習之餘游焉息焉作新之功豈出文翁下哉侯名琬字德資侍郎錢溥記

弘治七年甲寅知縣董鑰市地東南隅以廣學舍

十二年己未知縣郭經築大成殿講堂前月臺

正德十四年己卯知縣鄭洛書重建大成殿養賢堂訓導

劉充作祭器訓導劉昱樹栢于廟門

十六年辛巳知縣梅凌雲以義租重修學宮

萬曆三年乙亥知縣敖選重修學宮增置學廡於東南隅

九年辛巳教諭徐常吉作三友軒

萬曆九年三友軒記 余至海上之明年春諸生以學舍湫下將為余構堂于其側既卜址弗果及是夏潦驟水盈尺僕寒衣涉與蛙上下婢子着屐汲炊時時仆水中室人諄諄譴我于是諸生復申前議各捐私鏹余亦佐以升斗之費為屋三楹于廡之西偏落成因楹曰三友蓋取益者之意客有問于予曰子之于此傳舍矧燥

濕之不時而奚以更諸爽塏為余日子之故里去此不五百里而近猶桑梓也吾惟于此日進三益相與揚推古人披摳衷襟時或戶外屨去高闕兀坐龍見天游虛空生白吾尚不知天地之有高下而奚知蓬廬之有彼此又奚數數焉較貧與冷為既以語其人退而為之記教諭徐常吉撰

十二年甲申知縣顏洪範重修學宮

時大成殿啓聖祠皆重新之又廣明倫堂

月臺填教諭宅滂池

十九年辛卯知縣楊遇命義民朱錦重修學宮

三十年壬寅知縣劉一爌闢文廟地

時新作黌門勒文于壁曰壁水宮墻

四十七年己未知縣呂濬重修學宮復學前侵地

國朝順治八年辛卯教諭高遇重修學宮十八年辛丑教

諭曹忱增葺文廟重修文昌閣知縣徐贊助成之

訓導王汝礪共

襄厥成翰林院庶吉士邑人朱錦有碑記

射圃 明洪武中同知王文貞築射圃作觀德堂

正統四年知縣張禎創射亭及學之後堂

見前訓導徐研記中

成化十一年乙未知縣劉宇買學北隣地以闢射圃重建

觀德堂及左右廂

觀德堂三間東號房一間西號房十有三間

成化十一年觀德堂記畧 上海東吳鉅縣學政舉弛係令賢否尚矣成化甲午夏鈞州劉侯來令是邑首謁學宮進諸生講解畢次觀射于圃病其地陜隘而禮無所施遂毅然以開拓為已任明年春捐俸粥學北隣地廣袤若干中構觀德堂三間左右廂六間粉飾垣墉與弓矢樂器之類靡不完美每朔望蒞學必舉行之未三載成德達材者彬彬而起謂射不足養人以德乎又以文昌祠舊偏生舍乃遷于學東南以稱神棲改創東號房九間增葺西號房十有三間徙學門與櫺星門文昌門並峙而南置學官公廨修養賢堂添繕庫房嚴嚴翼

翼以次興舉學諭郭儀司訓陳元錄盧繼明謂不可無紀乃具書所謂觀德德堂者詩有之日肆成人有德小子有造請為侯頌之又曰文武吉甫萬邦為憲宜諸士勉焉翰林院侍讀學士華亭錢溥記

正德十四年巳郊知縣鄭洛書重修觀德堂

學田 元大德六年壬寅松江府給上海學田五百畝見前

趙孟頫記

至大三年庚戌邑人運使瞿霆發助學田五百畝見前藏夢解記

延祐元年甲寅僧善能獻私田四百九十有五畝于學

延祐五年再遷釋氏舍田記 上海由鎮為縣之三年縣始有學又十年學始有田又九年邑丞王君珪乃改作學于縣東延祐元年冬歷山張侯如砥來尹是邦延見諸生視其居則齋廬未治也庖廩未充也按其籍則田之析于郡岸若出于邑之賢士寓公者歲為米不盈四百石惕焉深懼士失其養而學政之弗舉爰洎學官

毛君夢雷謀大其規制而未知所出也上人善能者介邑人浦元姜濟請入私田四百九十五畝有奇為學官承業以佐經費侯既納其請則白狀于縣而輸券于學嗣主教事者方君遇聖以為向之克有學有田不易如此而人遽能不愛其所有以弛吾乏絕之慮是不宜使後之君子無迷也乃伐石徵文為記嗟乎大道隳裂儒墨之異趨久矣是果不可同歟易稱同人于野亨而謂同人于宗吝夫為善而不擇其類致亨孰大焉施惠而不施其黨去吝孰先焉上人亦嘗學于是邦土地之利其未爾爾竊嘉夫是舉也近乎吾聖人之旨而有非墨氏之所謂同者故為之記其目之細則碑陰存焉將仕郎台州路寧海縣丞黃潛記

明嘉靖中邑人國子生顧定芳始助田百畝贍學後知縣

黃文煒復置田百畝萬曆初知縣顏洪範繼之并歷歲入

官田共二百九十畝有奇

監生顧定芳捐田一百畝坐落二十六保每歲納銀二十兩 府斷吳明人官公田二十一畝坐落二十四保

每歲納銀二兩一錢四分 知縣黃文煒買張達田一百畝坐落二十六保每歲納銀十四兩 本縣斷入送學田一十八畝二分四分毫坐落十九保每歲納銀四兩八錢二分 知縣顏洪範買張威田二十畝一分四分毫坐落二十四保每歲納銀五兩三錢四分三釐 生員曹志道告明入官田一十一畝坐落二十八保每歲納銀二兩一錢已上俱在縣 姚涵田二百二十一畝坐落三十保正副段區潘憲告明送學作為義田每歲納銀二十兩公用 學廩在學 東南隅上下樓房一十間

名宦鄉賢祠 明正統己卯知縣鄭洛書作仰高祠依于

學宮以祀名宦鄉賢後遷于戟門之外左曰名宦右曰鄉

賢

名宦祠

晉長合侯袁崧

宋松江提舉董楷

元知松江府事僕散翰文

明治水戶部尚書夏原吉

巡撫南直隸工部尚書周忱

巡撫南直隸兵部尚書兼右都御史王恕

巡撫南直隸都察院右副都御史彭韶

提學御史陳選 松江府知府樊瑩

知縣祝挺 知縣李棨

知縣鄭洛書 知縣黃文煒

知縣徐可求 儒學教諭趙正



知縣彭長宜

鄉賢祠

唐中書門下平章事謚忠宣陸贄

後唐貝州宗城令顧謙

元平江萬戶費拱辰

浙東宣慰副使任仁發

浙江行省員外郎楊乘

明文華殿大學士全思誠

江西布政司參議蔣性中

淮府長史李伯璵

江西建昌府知府張紘

福建福州府知府朱豹

四川左布政使沈恩

湖廣布政司參議張萱

詹事府詹事贈禮部右侍郎謚文裕陸深

太醫院御醫贈光祿寺少卿顧定芳

都察院左都御史贈太子少保謚恭定潘恩

南京工部郎中李昭祥 貢士張泮

通政使司右通政趙灼 魯山王府教授蔡紳

巡撫山西都察院右副都御史唐繼祿

南京通政使艾可久 陝西按察司副使潘允哲

四川右布政使潘允端 雲南按察司副使喬木

陝西布政司參議王圻 山東按察司副使黃體仁

贈浙江布政司參政姚繼祿

湖廣布政司參議喬拱璧

山東右布政使張所望 贈通政使司參議張景平

太子太保禮部尚書兼文淵閣大學士贈太保謚文

定徐光啓

福建建寧府知府張元玘

社學 明正統天順間設於縣東北一百二十步各鄉凡四十九所教讀五十名生徒一千二百二十四名成化八年知縣王崇之重修正德末知縣鄭洛書以無敕額菴院爲之凡九十六所講行鄉約又隨社學爲社倉積穀賑饑有約長正司其出入

成化八年社學記 皇上嗣登大寶注意學校作興培養爲將來之用又慮蒙養弗端復有社學時御史陳公選提學南畿上海視學之餘詢及社學未有所乃委縣令李文買縣東北市民地四畝屋若干集材鳩工悉撤而新之闢門通道構講堂三間後堂如之中爲屋以屬前挾兩齋次列庖馮周築墻垣外樹坊表選童蒙穎秀充初其中擇可爲師以司訓迪予感斯舉見朝廷作興之盛爲文記之江震記

書院 仰高書院在上海縣儒學南 初知縣鄭洛書建仰

後別作祠于戟門左右遂改祠爲書院崇禎中設知府

方岳貢像于其中甲申之變人毀像出之復爲書院書院記 正德十六年春上海縣作仰高祠夏四月落之諸生高企等議鄉與宦之賢者共十有七人世不同爵位不同賢同宜祀于左鄉賢祀于右以賓主定位神而人之之義皆北向孔子廟春秋丁祭畢各以羊一豕一校官祀而獻焉縣以白諸巡撫李公巡按馬公提學蕭公郡守孔公從之近代之賢未有入祠者議論未定以俟後之君子嗚呼賢者勸不賢者沮祠亦足以教矣知縣鄭洛書記

義塾 鶴沙義塾在下沙鎮

義塾記 上海鶴沙義塾者皇慶二年縣人雅州守瞿君時學之所建前為廟後為塾而廟有殿殿有廡廡有門塾有講堂東西有齋舍有庖有庫而先聖先師之祭祀師弟子之廩膳則有田一十四頃以給之視州縣學蓋無差等矣其後瞿氏子孫日已陵遲田既易主而塾亦隨廢至正十八年縣大夫何侯始即故基而重構之宏壯麗密比舊有加仍勸知經之士割田七頃有奇以供祭祀廩膳之費及蘇君宗瑞之來為縣也以學政弗舉生徒散去遂延禮儒士易蒙俾主其塾事蒙于教養之暇益以典修廢墜為已責祠宇之未具者增之禮器之弗完者足之租稅之不實者正之其屋廬之多寡田畝之廣袤亦既立簿正以稽其數嚴契券以表其畔猶思後之人或失之也謹伐石以載始末戴良記

筠溪義塾在三林塘鎮 鎮人儲璇建錢福有記記見縣志

方氏義塾在下砂場鹽課司南 明嘉靖二十二年里人方鏞建又捐田以贍師生知

府順德何繼之鹽運使晉江洪富各有碑記鏞曾孫日旭日耀重修

附文昌祠 元至正七年知縣劉輝遷文昌祠于學宮北

至正七年文昌祠記畧 上海始為鎮時東有文昌祠鎮既陞縣遂改為學宮而祠其神于東廡至正五年冬十月縣尹劉侯下車展謁學廟見廡下祠顧謂教諭章服曰此非祠神之所也神教人忠孝其功為大聖朝既錫號故祠祠之于學終不若專祠為安服感侯言邑士章伯顏慨然以為已任乃除地學宮之北為屋四楹像設正中工未及畢而侯以憂去服亦秩滿遷後教諭朱以靈力就其緒復以侯意勸章即祠前為軒三間周甃其地以石于是籩豆有秩序列有容堂宇靚深塗暨解飭稱夫神明之居經始于丙戌之冬十月落成于丁亥之春三月徽州路欵縣儒學教諭屠性記

明正統四年己未知縣張禎建文昌祠門 見前徐研記

成化十一年乙未知縣劉宇遷文昌祠於學之東南隅以



其地改立生舍

見前錢溥  
觀德堂記

萬曆三年乙亥知縣敖選改修文昌祠

附徐學博去思碑 傲茲徐先生典上海教事携圖書  
山桐蒯緱敝衣羸馬而來首召諸生曰余奉若職以戾  
茲土也諸君子得無曰此得一博士而其心者乎人各  
有志余將與諸君子寓日溟渤弔海若君諸君子幸無  
以博士員遇我自是簡科條之繁瑣去之而申嚴修行  
譚經之約時時進諸生盡發六經諸史百家裨官之要  
諸生亦斐然鄉風鵲起鵲侍戶外履常滿蓋三年一日  
也癸未春舉進士留視草中舍而弟子來問記夫世稱  
博士先生為卑官歷階而上銀青金紫多通顯矣然有  
位通顯而所至汗皦去若敝帚無益于身後也今先生  
方處高華即先一博士高節獨行亦足不朽然則博士  
何負于人人之隨地可為千古者又奚直博士哉先生  
名常吉字士彰上海學用博士登進士者自先生始其  
能廓落坦夷不局踏常格者亦自先生始俞顯卿記

縣學公占

### 青浦縣學

青浦縣學在邑之與隅萬曆元年癸酉新建縣治知縣石

繼芳用顧氏義塾立學

顧從禮金棟  
等所捐地

作先師廟及兩廡前

立戟門濬泮池廟後為明倫堂東西兩齋西齋之南為敬

一亭堂東北為啟聖祠儀門內為教諭訓導宅後光祿寺

署丞顧正心捐千金修學宮學制始大備

九年辛巳知縣屠隆築師古齋清風亭闢廟前地二畝餘

臨河甃石闌建興賢育才二坊於左右

二十四年丙申久雨學宮壞知縣卓鈿重修學宮

萬曆二十四年修學記

青溪卑庠頽敝而儒學為甚

蓋中更汰革而重建于萬曆初元繼時剪荆榛而城市


樞樞版築之役十九奉雉堞十一以奉官府社稷黌舍  
又邑故圯址塗泥而堂構地力多瑕少堅以故傾欹頽  
毀劍浦卓侯來宰是邑捐俸入搜羨鏹總得若干繕乃  
塲工庀材廊廡修潔庭戶明澄又益以興賢育才二坊  
傍及崇祀秩然肅然俎豆輝煌稱祀典矣侯以興起斯  
文為已任凡所注厝事集民安以故縣不知興民不稱  
厲青邑新創當侯世而解首之發若與黌官為桴鼓之  
答尤非偶然則皆侯實心實政所鼓舞也高承祚記

三十二年甲辰知縣韓原善重修學官改建狀元解元二  
坊於廟之左右 為解元呂克孝  
狀元張以誠建

三十六年戊申推官毛一鷺建尊經閣於先師廟後別作  
明倫堂於廟之左堂之前構東西二齋徙啟聖祠於西齋  
之北堂後改建教諭訓導宅自建縣以來增葺凡四至是  
而規模壯麗矣

大啟六年丙寅颶風壞學舍知縣鄭友玄重修

天啟六年重修學記畧 青浦自隆慶間給諫蔡汝賢  
請建縣始其修學自萬曆間光祿顧正心捐千金始學  
基地勢窪下嚙之以大潦剝之以怒雨甚風旋致棟宇  
摧頽墻壁僵仆長吏循朔望率一至絃誦不聞章縫不  
集者久矣蓋諸生攝衣縣庭闕拒莫得入則擁立廟旁  
以待上之人或疑其非分相假不急相干望望然去之  
謁廟而不登堂登堂而不橫經史何暇徘徊歎息于廊  
廡闕廟之間乎即有好文者聞欲修舉謂非簿書期會  
所切責輒視如傳舍郵亭掉臂弗肯顧曰姑以俟後人  
而後之來者又若是學其能久支耶鄭侯下車適當甲  
子水災之後廳事上漏下濕賓館洞穴可竄視學廟疾  
趨而過幸無患不則幾且覆壓焉鄭侯睨而歎曰庠序  
之廢乃爾識者責備于有司其將何辭以對第邇來朝  
家多故民間無積聚公帑無羨財鉅費安所從出乎乃  
捐俸首倡與博士林公江公舉金有聲為監督以錢庀  
工以值傭力自丁卯春經始告訖仲秋士民來游來觀  
曾不意其神速之至此矣夫增庠而為崇闢隘而為廣  
飾陋而為華是名曰修今腐者易以良材頽者易以完



甕墁者易以繪綵是名曰朔侯治邑廉說右文愛士勸相勤而綜理密故子來如雲工成不日也嗟乎三代學校之設所以明人倫也鄭侯修廢舉墜不出尋常縣序中而士大夫服其豈弟作人之實殆古之文翁常袞王沂公哉因伐石紀之陳繼儒記

國朝順治十五年戊戌教諭王秉彝重修學宮

陝西參議張安茂作

碑記

學田 明萬曆三十七年己酉郡人尙寶丞徐肇惠捐助

學田

時學宮初建贍賑無資尙寶丞徐肇惠世閥名卿慨然有志於興育之地捐助本縣四十二三保田二百五十畝每年除完糧外淨租一百一十五石請詳學院散給貧生

四十二年商人方良捐田贍學

商人方良有已業田地一百零六畝捐助本學每年除完糧外折租銀一十一兩二錢貯學月考支銷

國朝順治十六年邑人參議張安茂助漁蕩歲租贍學

坐落本縣四十二保六區七區四十一畝四十二畝前後兩灣蘆芭漁蕩三處每歲除完漁課外租銀五十餘兩輸學修理學宮公用十六年五月申詳撫院張學道張批允立石

順治十六年助漁蕩碑記 夫事莫難于修舉廢墜而在今日爲尤難余見檀林祇苑神宇靈囿罔弗傑然雲構獨此闡道毓德講藝立言之地聽其摧圯剝落而罔知補葺所謂行部必謁過闕必趨之禮將爲具文也哉少參張公安懋由青浦諸生成進士其先公君一太史食餼本庠由恩貢舉鼎元撤鰲禁之金蓮煥木天之綺采詎非峯泖之秀鍾於闕宮而然與繼東海公而起者冠蓋蟬聯稱雲間萃喬宜少參公之思樂泮水而不忘芹藻也茲以湖泖漁蕩捐之學舍取漁戶歲輸供墁聖黌宮之用斯綢繆至計矣自茲以往將所捐以歲葺圯敗則此已飭之殿祠堂庶不致于剝蝕少參之功當與宮墻並久云教諭宿州謝再玄勒石

名宦鄉賢祠明萬曆九年辛巳知縣屠隆作名宦鄉賢二祠於戟門左

萬曆九年建名宦鄉賢二祠記畧 學必有廟以祀孔子又必有名宦鄉賢二祠以祀有功德于民與鄉先生之歿而可祀者所以善風俗厚綱常表忠孝誠大典也吾邑自興復以來庶事草創名宦鄉賢尚未有祠萬曆巳卯四明屠侯來茲邑乃白于督學御史李公撤義塾材建與二祠于殿廡儀門之左右祀大中丞林公潤邑侯石公繼芳于名宦祀憲副夏公禮楊公道亨同守張公霆贈尚書陸公鵠先太守公英學博張公時泰文學高公企于鄉賢俎豆有光絃歌乃聞既而學博易君與多士謀勒石祠下以垂永久而屬從禮記其事屠侯各隆字長卿 顧從禮記

名宦祠

晉長合侯袁崧

宋監鎮趙彥啟

明治水戶部尚書夏原吉

巡撫南直隸工部尚書周忱

巡撫南直隸都察院右副都御史海瑞

巡撫南直隸都察院右僉都御史林潤

知縣石繼芳 知縣鄭友玄

鄉賢祠

晉平原內史陸機

清河內史陸雲

宋衢州司戶參軍曹應符

明陝西按察副使夏禮

浙江秀水縣儒學訓導張時泰

雲南廣南府知府顧英 贈禮部尚書陸鵠

雲南按察司副使楊道亨

廣東廣州府同知張霆 文學高企

右春坊右諭德兼翰林院侍讀張以誠

國朝陝西按察司提學僉事諸舜發

社學 舊無定所自知縣卓鈿以各鎮無額菴院選教讀

各一名教習生徒凡一十七所

在城

應壘

北斡山

白鶴江

朱家角

崧宅

小蒸

鍾賈山

廣富林

泰來橋

七寶

金澤

杜村

黃渡

青龍

趙屯

古塘橋

青龍鎮學在鎮東北宋監鎮趙彥啟建里人任陳二大姓

嘗葺飾之中有聚星堂敕書樓

嘉定十五年青龍鎮學記畧 國朝承五季之弊斯文墜喪儒先泯絕間有山澤之癯知自孔氏則青青之衿相與宗之如白鹿岳麓鳩聚肄習官不與也皇化日升文治繼起始蒙表異賜書給糧至明道景祐間學始有官矣然藩鎮望郡之外或且因仍迄于慶曆之詔而學始徧于郡矣詔生員多者縣亦置學而學始及于縣矣治盛學與其君子材業成就惟帝時舉其小人聞禮知義厥心亦臧十室之聚百家之市居焉建學非化行俗美之極致歟玉牒趙君為青龍鎮至之日求謁先聖吏白以無其所君心病之遂謀講習之地以請于郡且捐俸錢三十萬以為倡太守鄭侯聞而嘉之助以郡緡如君之數于是士皆翕然買田于鎮治之東北二百步高燥衍夷廣袤百丈築大成殿于其東營四齋于其西曰博文敏行思忠篤信講堂中峙翼以先賢魁星之祠旁列主學職事之次門屋廊廡倉庫庖湍無不畢備又以其間田築射圃浚清池植以花竹繚以周牆役興于辛



已之夏而成于壬午之春為費三千緡皆一鎮之士共成之陳生公廡獨任其三之一又舍田租六百斛以為丁祭公養之用自今一鎮之聚父兄子弟轉相詔告而孝悌輯睦之風興矣余嘉趙君所官不高有民不多而所知者本所務者大故喜為之書君名彥啟字仲和朝散大夫權尚書兵部侍郎杜孝嚴記

書院 孔宅書院在海隅鄉慧日寺側故為孔子廟宋因其地撥寺之半租立書院以養士元初為寺所據至正初

寓公蔡庭秀言於府請上行省置山長員府上其言不報

里人章弼嘗修飾迎師以淑鄉之良俊

孔廟紀序畧 青浦縣治北故有夫子廟宋淳熙間里

人濬渠得玉璧三環二簪一蓋隋末孔氏三十四代孫禎宦遊至吳遂僑寓為吳人立家廟葬先聖衣冠于此璧環乃墓中物也今廟貌剝落墓址蒿萊郡里毛公司馬尤公邑侯韓公並次第捐助竭蹶鳩工若墓若殿若軒若門徑若耳房若橋道若櫟棹棹凡三越月而告竣焉

夫國家二百餘年來松號劇郡而先聖衣冠俎豆之墟竟化為荆榛狐兔豈宦斯者奪於簿書期會不暇式問問俗歟豈生長斯者忽於見聞耳目不及訪故老修營缺少歟豈地靈隱顯徵于百年而有待歟茲者郡邑諸公一時攬轡而謁遣餉若干贍將作而應陽陸君拮据風雪中三越朔坐使千百年狐兔荆榛一旦登之衣冠俎豆謂不有異數哉申時行記

清忠書院在青龍西南本章夢賢義塾至正中其子元澤

請於朝以清忠二字易今名

清忠書院記畧 故宋太師中書令郇國文簡章公得象以才能相仁宗上嘗書清忠二字賜之曰卿以此道事朕三十年矣故子孫世守是訓以為家法公之從子知樞密院事秦國莊敏公竊始仕試大理評事監華亭鹽樂其風土即家焉青龍之有章氏自茲始莊敏九世孫婺州路蘭溪州知州夢賢置莊以賑族姓建塾以教隣里子弟之俊秀經度基宇規制皆定事聞于朝門表義士既而公沒公長子元澤懼廢成緒謂義以教為急


亟繕完塾宇作大成殿奉正配位像群賢從祀東西廡其釋奠禮器罇罍豆籩簋盞坫爵如學官制講有堂齋有舍儲書有閣門垣倉庖溷溷無不畢具至正五年春二月告成額曰清忠以不忘家法淵源之自既又念之義塾私家之有也不若隸于公有司之可久復請于朝改爲清忠書院山長王之直學管其計歸田以畝計者千有一百歲入米六百石有奇資師弟子廩餼置祠宇奉卹公祀崇其本也右配秦國重始也左配蘭溪尚功也方事之殷塾師天台胡世儀與有協贊力元澤官至奉政大夫海道都漕運萬戶府鎮撫以母太夫人耆年辭歸侍養孝行有足稱者烏乎蘭溪公遠承卹秦二祖遺澤思以義亢宗事已克成而奉政公乃能卽舊規而恢拓之用弘先烈貽後則何其宗之多賢子孫耶此鄉之人蒙賴教迪文而有禮則清忠餘澤所被廣遠矣故書勒諸石至正十一年二月鄉貢進士教授徽州路儒學教授安定胡世佐記

義塾 金澤義塾在金澤鎮 里人林青建

橫溪義塾在唐行鎮 自青龍鎮學至此皆廢

橫溪義塾記畧 自京師及郡縣皆有學置師弟子員而教之以詩書六藝使知古聖賢之道此國家常制也爲其上者或病其游歌之無所又別爲義塾以分教之橫溪在上海西去縣治百里一日縣主簿陳君以公事至其地偶見頽垣廢址進父老而問焉則前縣尹何君緝所建社學也蓋規制將完而蕩然于兵火又北行若干里復見所謂孔宅者宅已墟而先聖之廟獨存愚民以異端土偶雜祠廟中禱禳祈禱必于是乎在君遂撤土偶投諸水遷聖像于向所建學處爲禮殿以居之具祭器嚴春秋二丁之祀且勸慕義之士出田二百五十畝以供祭祀教養之費乃言于其尹揭之爲橫溪義塾率鄉之士民舍菜于先聖先師落成之後爲之請記嗚呼古之長民者惟治與教而已惟其教民之或息也故淪胥爲異端之婦凡浮屠老氏之宮竭其力以興之君僅以一縣之佐斷斷焉撤土偶新學廬使斯民歸乎塗轍之正橫溪去縣治既遠風氣清淳習俗渾厚其民固易使也繼今以往人材之盛彬彬然自斯塾而出則君之遺愛又豈有既乎君名聚字敬德臨海人戴良記

谷洲義塾在澱湖東郡人謝伯禮建 楊維禎有記



縣學公占基地共二十二畝九毫俱免科糧

### 金山衛學

明正統四年己未巡撫工部侍郎周忱奏立衛學在衛良隅篠館街北中爲明倫堂作學舍於東西序其前爲崇德堂其後爲教授宅左爲居仁齋右爲由義齋松江府知府趙豫衛指揮劉惠西賢侯端經理其事

正統六年建廟學記畧 衛有廟學非古也而古教行焉孔子當諸侯尚武則救之以文曰瑚簋之事則嘗學之當萊兵劫魯則濟之以武曰右文事者必有武備請設左右司馬顧當用者則先之未嘗舉一而廢一後以文廟祀孔子武廟祀太公望判爲二途竟莫能一其後損武祀罷武學而置文廟學亦未聞焉我國家君師宇內作養文武士幾八十年而尤慮武臣子弟安于熙洽之久動作進退鮮克由禮英偉間生或局其材于是命

天下軍衛立文廟學如郡制典教者亦如郡曰教授而訓導則半之教其官之適庶與凡軍士之後秀登第者隨其材而庸之定爲著令隆綱常而原性之同乎天兼文武而見材之周其用然後知孔子之道如日在天如水行地也金山距松城七十二里許遵海而居未易營度巡撫廬陵周公提調學校御史吉豐彭公同心輔化而郡守保定趙公克相斯舉工善材良不勞而集廟殿兩廡戟門學堂東西序以及賓客之所肄業之室靡不完美斥鹵之境兜鍪之士得被冕服俎豆之化升降揖遜之容而作其親親尊上之心者皆由三君子有志文武之業故能祇奉德意于有成毓人才之效于無窮烏乎魯頌猷猷史克頌之晉師有禮楚人懼焉而况舞羽而苗格因壘而崇降將見孔子之教大行而賢才文化駿鬣乎虞周之盛者皆自茲始董其事者指揮使劉公請予記其成者衛學訓導陳師與傅鴻也翰林院檢討錢溥記

### 十三年戊辰提學御史劉福始建文廟


天順五年辛巳提學御史嚴淦都督董宸繕葺學宮

天順五年修學記畧 古昔盛時文武一途黨術皆學未聞有無學之地有不學之人周田不助文武異轍而欲求世之治俗之善也豈不難哉金山之為衛越在海隅人皆以瀕海之人介胄之士武事未習何以文為故自有衛以來未嘗建學正統己未巡撫周公忱奏請建學朝廷允之乃相地于衛之東北隅篠館街之北高亢靚深宜教宜習庀材鳩工首建明倫堂立居仁由義兩齋師儒居止之地生徒游息之處庖湏庫庖成有品則維時董督厥事則提學吉豐彭侍御勛經畫修理則松江趙太守豫衛揮使劉君惠西君賢貳揮侯君端而與化陳師輿實以分教職來與焉于是乎武臣子弟與凡伍符尺籍之秀朗英偉者偕來就學然學以始初廟祀闕然正統戊辰建寧劉侍御福以憲節至以為學而弗廟師何以崇費雖夥弗宜中止故係于三尺之下法可疑而情可矜者悉聽其贖或金或帛皆輸之學以為百需之費再踰月而就厥緒禋祀有所景仰有憑然未大盛也天順辛巳提學莆田嚴侍御淦至又進民生以增廣之大都督安慶董侯宸尤以興學為心俾毀堂門廡煥然一新故士之游于其間者靡不爭自磨濯文風由之而不變矣司訓鐔城梁君元礪石請記於戲少司空

不以武士為不可學而始創之大都督不以文學為可緩而振舉之侍御公尤能防範激勸于其間世道之復古于是乎占之矣惡得而弗書翰林院修撰陳鑑記

成化中巡按御史劉魁孟俊相繼增修

成化十七年修學記畧 三代已有庠序學校之設矣歷漢唐宋元皆行諸郡縣而武衛未之有聞國朝正統己未始詔天下軍衛置廟學務合文武士于一途使朝廷享實材之用也金山衛之有廟學自己未迄今成化辛丑歷歲滋久將入于毀監察御史高唐劉公魁巡按至衛與鎮守都帥合肥郭公鏞周覽庠舍而歎曰學本育材也而武以衛乎材顧茲危陋可不加之意乎亟命掌衛事指揮使西寧暨僉事魏文修葺之教授張濂訓導歐陽法贊助之慮材無由出也槩發官帑專命文董治之劉公既滿去而陝右孟公俊繼之恐工費有弗給也復量措使趣為之昔未備而今始壞者悉與維新郭公視其成而喜曰二公與我衛學烝我髦士學垂弊而復完士成德而有造于是來請記夫古之學者入有井牧問師之教出有擊刺騎射之法無異施也然以旬侯



綏要荒觀之綏在五服之中內三百里揆文教接甸侯也外二百里奮武衛禦要荒也又因其地而異其施焉吳春秋時實維荒服雖金山越在海濱今則有武以捍患而學以興教禮樂攸興也聲教遠暨也風俗大同也而何內外間然之有金山之士當益修文武之業而不失全材之用于諸君子上下協謀之盛心亦賴有光矣南京吏部尚書錢溥記

弘治十一年戊午指揮翁熊重建大成殿兩廡戟門飾聖賢像

十五年壬戌指揮西寧新學門

十七年甲子備倭都指揮王憲製文廟祭器

嘉靖十九年庚子督學御史楊宜初置廩膳生員

嘉靖十九年衛學初置廩膳記畧 金山衛故有學有師以教吏士之子弟及其民之秀者率可歲而貢士一

人于庭比于邑學蓋自正統己未迄于今百餘年矣而其士猶未得養于有司于是其當貢者亦相持不能決嘉靖庚子教授王新請于督學御史楊公宜得以文之優者二十人當廩膳之數而次第貢之其明年新率訓導蔣誥及諸生孫寅陸中美等言于巡按御史舒公江曰國家疆域萬里以養士二十人不為費然而可以見一視之仁右文之盛焉如其請當無不可公以語郡守何侯繼之別駕李侯纂郡憲黃侯洪毗前率亭縣令尹執中僉曰教授言是黃侯則又進曰洪毗閩人閩有平海衛者實得廩其學生金山一衛也援以請其可于是舒公會同都御史夏公邦謨疏于朝如黃侯言大宗伯上議曰御史言是得詔置廩膳二十人教授新既拜舞以謝退語于衆曰我國家以文為治自洪武至正統其化大行則衛于是有學又自正統迄今化日益淪浹則士始得養于有司蓋係乎時者如此不可無述也乃幣而徵文于階階嘗讀易為卦六十四而有取于養士者二其一鼎之象曰大亨以養聖賢言上之養士也其一頤之象曰君子以慎言語節飲食言士之自養也夫上必養士而後可以成治士必自養而後可以佐時三代以降士或從事于學而徇外以戕內則是不能養其入

而于節飲食之義垂率已以從物則是不能養其出而于慎言語之旨悖如是而徒養于上之人其又何能佐時以無負于國家也階不敏欲規于多士遂不辭而記之司經局洗馬兼翰林院侍讀學士徐階記

萬曆二十一年癸巳知府柳希點教授翁興賢參將李震

### 重建文廟大繕學宮

先是弘治間衛學士不登科第至是八十餘年教授翁興賢乃請于府衛濬河改闢重建廟庭掘地得聖像倒埋土中亟禮而出之甲午以後科第遂不絕

### 崇禎中知府方岳貢重修明倫堂

本朝順治十五年戊戌巡撫都御史張中元巡按御史李

森先提學道按察司僉事張能鱗署學事府學訓導黃中

亨大修學宮廟貌一新

時頌廢已久計費九百餘金撫按批發金山城塹租豆一百二十石

提學道及紳衿捐助四百餘金皆訓導黃中亨經理共事中亨又捐歷年俸金二百餘兩成之

先師廟在明倫堂東

啟聖祠在文廟西

名宦祠在啟聖祠左室

松江府知府何繼之

松江府同知李綦

松江府推官黃洪毘

督學監察御史楊宜

巡撫南直隸都御史夏邦謨

巡按蘇松常鎮監察御史舒汀

華亭縣知縣朱執中

儒學訓導蔣詵

鄉賢祠在啟聖祠右室

松江府志卷之二十一  
浙江温州府同知林恕

河南胙城縣知縣封浙江布政使莫天洪

衛學公占基地共三十二畝五分七釐俱免科糧

松江府志卷之二十一終

松江府志卷之二十一

兵防

沿海之有兵爲屯衛也居而戍猶世守爾巡徼之有兵  
爲捕治也統於吏猶隸卒爾自倭難作而設備策應於  
是乎有分汛之防闌入內地於是乎有鄉鎮之防餘餘  
艦習擊刺蓋百餘年事矣今則置大帥宿師武臣其中  
兵民錯處若重鎮焉郡之有兵防於今爲烈云

歷代兵制沿革之要

唐制華亭鎮在縣治西南

見祥符圖經

鎮有將有副所職捍防守禦之事或以土豪及小校爲  
之

青龍鎮在青龍江上天寶五年置

按崑山常熟海鹽吳江惟有縣鎮而華亭

縣外又有青龍者舊為江海要地也

宋制縣鎮青龍鎮仍舊外設防城兵百五十人巡檢司四

青龍鎮祥符間以鎮將理財景祐中監以文職

按屬武亭記縣

有寨兵四所據前志圖有杜浦寨續通鑑有松江寨餘二無考或疑寨即四巡檢司

管界水陸巡檢司在青龍鎮金山巡檢司威滌巡

檢司杜浦巡檢司

元制鎮守松江管軍達魯花赤萬戶府在府治東北達魯

花赤萬戶副萬戶各一人

從三品官皆世爵其幕僚經歷知事等則序遷

鎮撫

所在萬戶府東側鎮撫二人

正六品

千戶所九總為五營東營在甌庫巷三所西營在

豐樂橋西北二所南營在太平橋一所北營在居

士橋北一所長橋營在長橋西南一所所置達魯花

赤千戶副千戶各一人

一從四品餘五品

通領百戶七十三人

彈壓一十八人

鎮撫千戶各有幕僚餘各有吏

巡檢司四

屬縣

洙涇澱山威滌金山

鎮遏上海等處萬戶府在縣治東南八十步歲於松江

萬戶府分官鎮之後改名鎮守

鎮撫所在府東側

元末添置

巡檢司五

屬縣

杜浦青龍烏泥涇鄒城新涇



明洪武初設民兵萬戶府簡民間武勇之人編成隊伍以時操練有事從征事平還復爲民有功者叙後革萬戶府而設守禦松江千戶所其時尚每歲調蘇州衛官軍更番戍守至洪武三十年始定今制以金山衛中千戶所一署分駐之開建公署於府治東南舊設千百戶鎮撫二十三員旗軍一千一百二十名以守護城池設屯田一百六十一頃有奇歲收子粒三千四百六十餘石以充其月糧有不敷於三縣民糧支補軍兵之外又僉選民壯操練以備禦非常正統景泰以後歷有更制經嘉靖之倭警而兵額頓增隆萬承平稍爲裁減陸兵額

設三百名舊以所官一員統練水兵額設二百名哨船二十隻亦以官一員統練每歲糧餉額徵銀三千三百六十九兩有奇

守禦松江千戶所

在府東南望仙橋東內鎮撫司在所西原今廢

職官

本所正千戶四員副千戶七員掌印兼清軍屯局一管巡鹽巡江一管巡捕一管城操一管運糧一管陸哨練兵一管水哨練兵

百戶十員  
鎮撫二員  
攷初制千戶九人百戶七人鎮撫二人

兵額

本所原額旗軍一千一百二十名內運糧四百七十名  
操備一百八十名其老幼二十六名食糧三斗餘皆事  
故缺伍又三巡每

軍十名共三十三名  
陸哨民兵三百名水哨民兵  
一百六十名哨船二十隻

運船四十七隻軍四百七十名內在城船五隻該  
軍五十名在屯船四十二隻該軍四百二十名

軍屯

本所屯田一百六十一頃四畝坐落上海縣二十保共  
屯田軍七百八十四名內運軍四百十四名每名該徵  
糧三石共一千二百四十二石城操三百七十名每名  
徵糧六石共二千二百二十石二頃共徵屯田子粒三  
千四百六十二石抵作軍人月糧如  
有不敷於華上青三縣民糧派支  
本所城內外墾地運營地等項每歲該租銀  
一百三十三兩聽本所徵收抵軍需支用  
本所派守四門千戶  
各一員餘軍各十名

本朝順治二年大軍定松江遂駐鎮於府十八年部議每

省設全省提督衙門關中梁公化鳳以平海寇功晉太

子太保左都督開府郡城復疏請增置兵馬得 俞旨

仍設前後左右中及城守等六營而各衛所皆附焉

左都督梁化鳳疏 臣受事後整理標兵親歷沿海按  
行各汛詳審形勢通計衝緩自金山衛迤北及柘林青  
村南滙川沙寶山吳淞劉河福山一帶俱逼處處海邊自  
梅舍江陰孟河則直達京口延袤八百餘里處處皆可  
登犯然潮退之後僅通小港其間水面寬濶波濤汪洋  
大鯨出入揚帆無阻者南來要衝則為松江府之黃浦  
江深入北犯則為鎮江府之揚子江惟此二處最為要

皇上奮揚我武于鎮江府特設大將軍輔以四鎮京口壁  
壘赫然雄峙今膽落矣獨是黃浦江滙吳越之水東至  
吳淞入于海江面濶者十餘里次亦五六里猶之瓜儀  
金焦之浩渺也倘寇鯨乘潮人犯不踰時而上海松江

片帆可到自是而南可抵嘉湖北可抵蘇常已經臣繪成圖本備述沾說矣先年閣臣洪承疇議設提督一員宿重兵於松江以厚邊防而遏流突居重馭輕便于調度者深有見於衝險要地控制腹心武備不可以不壯軍實不可以不克也臣標原設六營自經裁減之餘止存中左右三營共見兵二千二百名夫臣膺江南四府之寄當海洋千里之衝所藉以彈壓策應僅此寥寥而賊鯨寇衆動盈千萬一當有警遠近戒嚴將合之以守乎抑分之以戰乎至事迫調遣臨時猝集臂指難聯東南半壁誰司捍禦豈容坐視單弱而貽誤封疆也伏祈皇上軫念首衝危疆卽係財賦內地准復六營之舊以恢戰守之資除臣標見在二千二百名外不拘本省隣省酌量緩急再行抽調三千八百名共合六千名立中左右前後城守六營其將領中干把等官悉照見行經制至于兵機遲速介在呼吸必藉馳驅以資制勝合無比照北省馬三步七以成營規使臣得竭力盡心練成一旅聞警速于應援賊至立爲撲勦于以殲鯨鯢而靖海波或可少抒皇上之南顧矣

### 職官

江南全省提督總兵官一員

提標中營遊擊一員 守備一員 千總二員 把總四員

提標左營遊擊一員 守備一員 千總二員 把總四員

提標右營遊擊一員 守備一員 千總二員 把總四員

提標前營遊擊一員 守備一員 千總二員 把總四員

提標後營遊擊一員 守備一員 千總二員 把總四員

提標城守營遊擊一員 守備一員 千總二員 把總四員

### 兵額

提標經制額設中營官兵一千名 有馬戰兵三百名 無馬戰兵二百名 步守兵五百名 坐馬二十二

匹 戰馬三百匹

提標經制額設左營官兵一千名 有馬戰兵三百名

無馬戰兵二百名 步守兵五百名 坐馬二十二

匹 戰馬三百匹

提標經制額設右營官兵一千名 有馬戰兵三百名

無馬戰兵二百名 步守兵五百名 坐馬二十二

匹 戰馬三百匹

提標經制額設前營官兵一千名 有馬戰兵三百名

無馬戰兵二百名 步守兵五百名 坐馬二十二

匹 戰馬三百匹

提標經制額設後營官兵一千名 有馬戰兵三百名

無馬戰兵二百名 步守兵五百名 坐馬二十二

匹 戰馬三百匹

提標經制額設城守營官兵一千名 有馬戰兵三百

名 無馬戰兵二百名 步守兵五百名 坐馬二十

二匹 戰馬三百匹

糧餉

提督各標營官兵歲支俸餉銀十萬七千六百八十兩  
三錢一分三厘六毫 米二萬一千六百石 馬匹歲

支料二萬四千五百九十五石二斗 草七萬六千七  
百五十二束

在外沿海黃浦金山等營官兵三千四百二十四員名

馬七百三十匹歲支俸餉銀六萬六千二百九十四兩

三錢八分二厘八毫米

一萬二千二百四十石

府境巡徼司兵之署 凡內郡要衝地各設巡檢司主譏

往來奸慝及私販禁鹽逃亡軍民罪囚并無引私越之

人仍皆責以捕逮警邏之事皆設於洪武初後歷有更

置蓋因其要阨之所有時變遷故司署亦隨異宜耳

華亭金山司

洪武初建於張涇堰至十九年徙  
建胡家港口在華亭東南六十里

南橋司

洪武初原建於南橋鎮稱戚木司十九年徙建  
於戚木涇萬曆九年復徙於南橋改今名在華

亭東南

七十里

婁縣泖橋司

洪武三年建於泖橋之東數里  
泖涇鎮在婁縣西南三十六里

小貞司

洪武七年建於小蒸鎮今鎮地分屬  
青浦而官屬婁縣在縣西三十六里

上海黃浦司

洪武六年建於黃浦之上閔  
行鎮在上海南二十一保

三林庄司

洪武六年建於三林塘  
鎮在上海東南十七保

吳淞江司

洪武五年建於吳淞江北  
岸在上海西北二十七保

青浦新涇司

洪武六年建於二十九保新涇  
今在青浦四十五保青龍鎮

澱山司

洪武初年建府西北六十里  
今在青浦四十二保安莊鎮

南澹司即周浦司

陶宅司

今俱  
廢革

每司設巡檢一員弓兵在腹裏者例三十名沿海沿江  
者加額或至七十名松境惟澱山司弓兵四十名新涇  
等皆三十名各分信地每司以數鎮屬其官領之昔之  
經畧地方者視村鎮要害而設專為巡緝盜賊護衛村

氓邇來廢弛其司官或因公解散毀從便就任或因註  
選踵躡任若傳舍其司兵或散處村落宿蠹冒濫名實  
混淆即失事加罰噬臍無及今雖鎮戍宿  
有官兵而設官遺意不可不專其職守也

鄉鎮險要之防

松郡東南瀕海西襟湖泖盜賊出沒尤

警於海寇以一郡論之上海當賊之來華亭當賊之去

青浦當蘇松二郡往來之衝賊由大海而來登泊海岸

者必草竊也從江口而來逕入者必大鯨也草竊易於

勦除大鯨入江揚帆直入城下然後分掠華亭諸鎮故

上海當賊之來華亭附郭不當要衝然其西北澱山三

泖可以通蘇州西南呂港獨樹可以通嘉興賊如轉寇

二府必由此進故華亭當賊之去青浦北通崑山東通

吳淞西通湖泖若由二郡出入此乃必由之路故青浦當二郡往來之衝然嘉靖間賊連歲犯上海及郡城未嘗竟往他郡者惟水備吳淞所李家洪黃浦口而歸重於寶山陸備青南川柘蔡廟獨樹營而歸重於金山此一郡險要之完策也

**華亭縣信地** 南至金山衛東南至柘林青村俱濱海東北至泗涇七寶上海界東至十八保上海界西

至婁縣界西北西南皆婁縣界

**葉謝鎮** 在華亭東南地隸八保與蕭塘隣其外為柘林處腹而勢衝有事之日北與閔行相策應西與

漕涇為犄角往年倭寇入巢柘林嘗自此渡浦至瓜涇而西以犯府城此時議屯鄉兵於鎮以遏之

**曹涇鎮** 在華亭縣東南七十里界於柘林金山之間逼處護塘之內為鹽徒淵藪其操艘出入波濤閑

習如御馬海賊頗畏之往年倭夷內犯嘗被此地鹽艘驅迫小島中圍之數匝焚舟絕糧賊大窘遁去故其時練鄉兵之議有司請擇本鎮著姓使得部署竈丁結立團營以自為守一時亦暫行之

**婁縣信地** 南至金山衛平湖乍浦界西南至風涇嘉善界西至泖青浦界西北至章練塘長洲界北至塘

橋青浦界東北至泗涇華亭上海界東及東南皆華亭界

**洙涇鎮** 為婁縣巨鎮古於此置大盈務東通黃浦西通湖泖水寇睥睨之地也設泖橋巡司在鎮巡緝

以其南遵水達海鹽平湖北從泖達蘇州嘉興鹽艘出沒便利故駟魁大猾號召暴橫下命作奸之徒趨之為窟

**張涇鎮** 隸婁縣七保去縣南五十里宋人堰海十八所遠別建官衙於堰南鎮有陸路北通府治南通金山可

以直達間有支河斷港置石梁數十以聯之無事以通往來有事可以策應昔年倭難時咸議金山離府太遠兵勢太孤欲特遣重兵一枝屯練於此為金山聲援誠

計之得也

上海縣信地

東至川沙堡濱海西至七寶鎮華亭青浦界南至烏泥涇閔行華亭界北至真如柵橋嘉定界西南至莘莊華亭界西北至盤龍青浦界

按上海與華亭形勝迥異賊多從海子口入不五十里為吳淞江為黃浦黃浦逼縣東門賊至即抵城下然後

分隴或循浦而南或由江而西皆可達郡城是一郡之要害在上海上海之要害在黃浦黃浦之要在吳淞所

吳淞所之要害在李家口守李家口以拒賊

上游守黃浦口以遏賊橫渡守禦不出此

嘉靖甲寅設海防道以僉事董邦政領之募戰兵三千名備倭丁已改海防道為海防同知存兵一千二百名

已未因海上無警汰存兵六百名海防廳仍駐本府增派兵銀應隆慶已巳至壬申漸次減革止存兵二百

七十名以于本縣均徭內支應分為水陸二哨水兵七十名隨海防駐本府陸兵額少不足防守邑治襟江帶

海鹽盜出沒無常城中時有寇警練兵者皆以失事被遣萬曆癸酉調百戶瞿彥威防守請歸松江水兵復原

額兵六百名六門設正兵六屯周城要害處設伏兵七

隊水兵分兩翼上巡龍華港下巡東溝口以防外警萬

曆乙亥因海上兵銀不足議以徭銀奏補遂復割本縣

兵額以一百六十名補川沙堡五十名補寶鎮堡實存

兵三百九十名議者每

憂寡弱思復舊額焉

新場鎮 在上海十九保距下沙九里一名南下砂元初

兩浙最往時賈販特盛為

海寇窺伺之地曾設備云

周浦鎮 在上海十七保去縣東南三十六里阻海之三

存者地達川沙諸處

臨浦要害之一也

閔行鎮 在上海十六保西為橫灤指為要衝者以其當

也地勢與葉謝相對峙設備則聲勢

相應援昔年倭寇時嘗屯兵以守之

烏泥涇鎮 在上海二十六保界兩縣間設稅課局地當

上海正南與浦東三林周浦二鎮相望議備

海者謂賊若自二鎮渡浦而西可直犯縣治須於此設備以遏之

**七寶鎮**

隸三十五保在華亭東北上海西南青浦東南塘水道以至鎮則達泗涇入郡矣上海西門舉足三十里陸路以抵鎮亦達泗涇入郡矣地方有警通聲息便策應其在此乎

**青浦縣信地**

東至七寶鎮上海界西至澱山湖長洲界南至泗涇華亭界東北至楊林寺嘉定界西南至金澤嘉善界西北至千鑿港崑山界按青浦北通吳淞江西南二路控引湖泖乃蘇州適中要害之處嘉靖間倭自崑山由爛路港直至松江南門為湯克寬兵拒却後又突至松江西南城下廉知有備乃遁掠福田寺出泖湖劫章練塘馬家堍又以別枝出澱山湖朱家角雖官兵尾擊互有勝負然取竟晏然趨上海如蹈無人之境此前車也異日之所當備者宜鑒焉

**廣富林鎮**

在青浦三十八保為入郡之孔道郵傳往來之要衝

**黃渡市**

在青浦三十一保去縣四十五里臨吳淞江之上若寇從江而來或西犯青浦此其必經之道而北岸即屬嘉定設備之策宜兩縣集鄉兵以守之

**金家橋**

在青浦四十九保去縣西北十二里西界于崑山長洲兩境為通逃淵藪不法亡命彼此竄匿又逼處江濱盜防宜嚴須兩郡協應遏之

**金澤鎮**

在青浦四十二保與澱山對峙四面皆湖泖又蘇境浙境之水鄉交會故鹽盜出沒焉向設巡司在鎮如有事此為水道要害所當議應援於蘇浙者也

**雙埭王巷**

在青浦四十二保去縣四十五里自松至蘇人多駕船為生或務漁為業熟水道有議以保甲之法聯合漁舟盜發責令救擒是或弭盜之策也昔年倭寇從此趨蘇亦為要害之一



軍兵總額糧餉之數 府凡一衛五所額設正軍五千二百餘名額派三縣軍儲糧四萬三千八百三十餘石或增加焉其水陸民兵散布三縣及緣海歲額共四千二百餘名船隻駕夫馬匹草料在外

華亭縣額設陸兵三百名水兵二百名

上海縣額設陸兵四百名水兵八十名哨船八隻

青浦縣額設陸兵二百三十名水兵七十名哨船六隻後增設九隻

金山衛

松江圖說曰嘉靖中倭難起乃於本衛添設遊擊將軍統領馬步游兵往來巡徼北以護松江西以援乍浦及事平遂已之設蘇松叅將坐鎮衛城舊屬青村南滙二所堡至是益以柘林川沙寶山三堡皆屬統轄

川沙各設把總守之衛所統陸兵一千七百名有警以該營為正兵以乍浦及諸堡為奇兵一聞警報左右策應首尾救援不惟蘇松兩郡之藩籬既固而杭嘉湖三郡之肩鑰亦寄矣

建置

衛在府東南七十二里南瀕海與金山對峙西連乍浦東接青村南滙嘴東北抵吳松江控引幾三百里洪武十九年開設指揮十

五人鎮撫三人領千戶所七

左右前後四千戶所在衛城廨宇久廢正德辛未備倭都指揮陳藩重建

官軍

洪武元年定衛所官軍大率以五千六百人為一衛一千二百二十人為一千戶所一百一十二人為一百戶所每百戶所設總旗二名小

旗十名通以指揮千百戶等官領之

衛設指揮使一人同知二人僉事四人鎮撫二人如世流襲替報都指揮使司達所隸都督府移兵部其陞授

改調增置無定員凡使與同知僉事皆考選掌管衛事  
 每歲撫按藩臬察其賢否五歲一考選軍政廢置之一  
 人統衛事曰軍政掌印一人練兵一人屯田曰軍政僉  
 書京操巡捕出哨備禦軍器漕運諸雜務曰現任管事  
 編諸行伍曰帶俸差操比撥軍補軍替軍選軍募軍並  
 統於掌印鎮撫掌刑獄經歷掌出納文移知事佐之凡  
 城池時葺浚之度其材力軍十之三民十之七 本衛  
 實設指揮十八人內掌印一員管屯一員三巡一員城  
 操一員領千戶所七左右前後四所在衛城左所千戶  
 五人百戶六人右所千戶三人百戶一人前所千戶六  
 人百戶十二人後所千戶五人百戶十人所鎮撫一人  
 中所以守禦松江分署府城中前所以守禦青村分署  
 青村鎮中後所以守禦南滙分署上海十九保經歷  
 司經歷一人鎮撫司鎮撫二人軍儲南倉大使一人  
**戰船** 查本衛陸營號船八隻每隻捕盜一名舵工一名  
 捷易使萬一海內有事即可抽出哨探但該衛沿海一  
 帶皆鐵板硬沙最難泊船故不設舟師萬曆十九年關  
 白報警議設水營沙船四十隻雖以金山為各原未停  
 泊金山後裁減至一十四隻又改造號船十隻汎時遠

哈羊山等處汎畢收泊李家洪嗣因本府黃浦鹽盜生  
 發議將各船汎畢撥守黃浦一帶蓋此浦係漕船商舶  
 日夕往來要路藉  
 此把守最為得策

**牧馬屯田**

兩京太僕寺所屬該每年比較府衛州縣牧  
 馬共三百八十八處其不比較衛分二百九

十五處金山亦在不比較數中每五年造馬騾文冊送  
 南京府部每十年造馬騾奏副本冊并繳兩京府部  
 府境金山衛五所屯種原派總旗每名種田三十畝小  
 旗每名種田二十四畝軍人每名種田二十畝總小旗  
 軍人俱每名歲納夏秋子粒六石內夏稅麥三石秋糧  
 米各一石公差漕運減免三石納麥一石五斗米豆各  
 七斗五升每納一石加耗五升入  
 倉作正支銷見松江府備照冊

本衛左右前後四所并守禦松江青村南滙共七所屯  
 種田地俱坐落上海縣十九二十等保地方共該屯田  
 旗軍餘一千七百二十名田三百五十二頃八十四畝  
 原該子粒一萬三千二百二十石除運糧旗軍餘四百七十  
 名免一千四百一十石實納子粒八千九百一十石凡  
 子粒俱運赴本所倉交納收貯聽放本屯官軍俸糧

本衛左右前後四所該屯田旗軍餘六百二十四名田  
一百二十七頃八十八畝坐落上海縣十九二十保原  
該子粒三千七百四十四石除運糧旗軍餘一  
百名免三百石實納子粒三千四百四十四石  
本衛軍例免漕運嘉靖三十二年巡撫彭公黥巡按孫  
公慎會奏言南方衛所沿邊者成腹裏者制也邇年  
迺以松江所運船二十艘改派金山衛及青南二所代  
運邊腹互失其職宜遵舊制部覆報可復舊至萬曆間  
復有議及者寢不行

**軍兵糧餉** 本衛原額官軍舍餘二千二百餘名民兵三  
千餘名後存陸營民兵六百八十七名水營

民兵四百四十五名軍選鋒五百六十名後存五百二  
十七名戰馬三十六匹日給口糧俱本府屬縣練兵銀  
內支

給 本營官兵糧銀及叅將供應馬正草料共銀八千一  
百七兩零又沙船二十隻該糧銀三千一十六兩零

本朝提督標經制額設叅將一員 中軍守備一員 千

總二員 把總四員 有馬戰兵二百名 無馬戰兵

三百名 步守兵五百名 各官坐馬二十四匹 各

兵戰馬二百匹

順治四年設金山衛守備一員 掌衛印專理  
七所屯田

**金山經畧之要**

隆慶中鄭若曾議曰金山衛南臨大海西控浙巖北之  
沙塗至此而盡南之山嶼至此而終賊自下入山分踪  
單西鉞可以直搗乃浙直第一門戶也洪武初安遠侯  
經畧海上置衛於此而以備倭都指揮領之誠得備禦  
長策承平日久武備廢弛嘉靖倭起徐海欲據為巢攻  
圍甚久天幸獲守時遂設遊擊一員駐劄亦重局鑰之  
意而迎擊尾追遙援旁應之計漫不之講宜嚴為令與  
接壤兵衛相為犄角毋致賊取道毋致賊延蔓有失事  
者弁論可也

萬曆中督撫宋 議曰金山衛大海襟其南松江在其北東為青南之上游西為乍獨之界限近因查閱城池空虛防守單薄建議題請改編軍伍填實衛城仍移改蘇松叅將駐劄該鎮原有民兵五百六十名選鋒軍餘五百六十名共成二營塘健牙兵等役四十名俱聽叅將統領又選委慣戰總練官一員哨官千百戶五員常川與柘林青村兵合營屯操東至吳淞寶鎮西至乍浦獨山北抵松江迤北一帶遇有警息往來截殺添設唬船八隻以資探報其金山衛所弁各城堡把總指揮等官軍兵舍餘悉聽調度如有應援失期觀望悞事依法究治一應守城巡哨事宜俱照舊規酌量編派但兵家之勢要在虛實罔測分合隨宜戰守互用近該道鎮議得南滙當海勢之衝為吳淞金山適中要地倭寇往往在此登犯已經議題每歲汛期總叅三營各挑精兵一枝赴南滙駐劄分伏海塘遇有倭寇登犯即時奮勇勦滅萬一金山吳淞有警則回兵掩襲內外夾攻斯為折衝制勝要畧也

柘林堡 松江圖說曰東自橫林墩為青村界西至胡家

港為金山界各二十五里北至南橋鎮十八里南至海塗半里許皆其信地初設民兵千名後裁減至四百名萬曆初年以兵力單弱加募足五百六十名十九年以後加增至今土浙水陸兵弁調撥金山衛軍餘該保督同哨官管領訓練仍聽蘇松叅將合營團操設唬船四隻以資探報汛時督發出洋汛畢回營每於隆冬之時派守附近村鎮其貼駕軍兵於青村所選補又設廠房二座一立於東袁浦石橋鎮左營練兵官一員分守一立於西路滌缺口右營練兵官一員分守而陸路則委官一員司巡守三員皆以武舉生每廠各派兵一哨更

番防禦有警則併力捍守云

官軍 初議移撥金山後千戶所官軍守駐後於本衛四所抽撥軍餘三百名建造營房三百間給與住守

額設把總一人守堡官一人  
陸路官二人練兵官二人

本堡額設民兵一千名後裁減止存五百六十名戰馬二十四匹又設號船四隻兵夫一十四名萬曆十九年

聞警議增見存土客民兵六百名

屯田糧餉 原設營田三百零六畝坐落華亭十二保地方出給各軍租種每畝給租米七斗本堡官

收輸糧之外聽該堡支用

本朝提督標經制額設守備一員把總一員有馬戰

兵四十名無馬戰兵六十名步守兵一百名各

官坐馬六匹各兵戰馬四十匹

柘林經略之要

嘉靖中倭寇入據柘林為巢者其故有三一是各處海壖多灘塗閣淺而柘林獨否其來易於登岸其去易於開竅一也一是海濱至內地必繇小港出浦若非潮至則水澁難行柘林之西獨有上橫涇歡娛菴深而且濶可縱行舟片帆出浦即是葉謝行十八里即抵郡城二也一是地方素聞富饒大家多蓄積盛宮室屯聚有資棲止可容三也將來備倭當知永鑒矣

萬曆中督撫宋議曰柘林總自滌缺港起至橫林墩止皆其信地該總原有民兵四百名戰馬二十四匹近復議得該堡民力單弱加募民兵一百六十名共足五百六十名為一營督同哨官管領訓練仍聽蘇淞參將合營團操又因其地險要復行修理營房汛時參將帶兵往來駐劄添設號船四隻以資探報其貼駕軍兵於青村所選補附近戚木陶宅二巡司弓兵八十名合聽該總調度合營操練有警則併力截殺汛畢聽各獎舊巡緝其本堡官軍并金山青村等處俱照舊規撥兵晝夜往來巡哨有警飛報總兵參將青南等處互相應

援不得各分彼  
此致悞機宜

青村堡 松江圖說曰嘉靖中倭入寇堡被陷乃設把總一員統民兵千名守禦事寧裁革把總汰存民兵止百名於該所內挑選軍兵卽委所官操練聽柘林把總節制萬曆初盡革民兵增軍兵另委官統操汛時督發出洋瞭探東至南匯界五墩西至柘林戚滌墩各二十五里北至二橋南至護塘皆其信地自堡至府城於西門道高橋或從梁店出閘港或從莊家行出葉謝過浦水程為一百里有事聲援頗遠耳

建置

守禦青村中前千戶所在青村鎮洪武二十年建鎮撫司軍器局在城演武廳在南門外千戶三人

所鑄撫一人  
百戶十二人

官軍

官卽金山衛中前千戶所分置也千戶五員考選掌印一員城操一員三巡一員屯局一員鎮撫一員百戶十員分委陸路一員守

港一員守印一員其餘聽差

本所旗軍一  
千三百名

本所墩臺自柘林堡東西袁浦墩起至本所東五墩止共一十三座每座撥軍五名瞭望海洋近每墩又增一名共六名

屯田糧餉

原派軍儲本色米一萬二千四百六十九石二斗

本所屯田旗軍餘一百五十六名田三十一頃九十六畝坐落上海縣二十堡原該子粒九百三十六石除運糧旗軍餘五十名免一百五十石實納子粒七百八十六石本所軍收貯抵充本所官軍月糧

本朝提督標經制額設守備一員 把總一員 有馬戰

兵四十名 無馬戰兵六十名 步守兵一百名 各  
官坐馬六匹 各兵戰馬四十匹


青村經略之要

隆慶中鄭若曾議曰松江地形三面臨海金山當其南  
南滙當其東青村其東南二面轉屈之會乎故金南之  
間此為要衝舊以千戶領之勢殊單也至  
嘉靖甲寅冬季為賊所陷始設把總於此  
萬曆中督撫宋 議曰青村南滙實為南海要區倭  
寇首犯之處舊時各設把總一員統領重兵防禦後海  
警既寧當事者不熟察其形勢遽議裁革以青村屬之  
柘林總南滙屬之川沙總借留民兵百名軍兵二百名  
各委本所千戶統領其民兵悉係勢豪家奴挂名冒餉  
千戶職卑莫能制伏而軍兵又為二總調取守堡及致  
要隘空虛後議將前項民兵百名盡行汰革省其工食  
加選軍兵三百名以足五百之數選委慣戰將官一員  
訓練專備本地戰守俱屬參將提調川柘二總止照舊  
各總本部之兵非遇十分警急不許掣守堡城以蹈顧

此失彼之弊其青村信地自胡家港起至翁家港止南  
滙信地自翁家港起至五團止各自防守仍照舊規每  
處撥軍五十名不分晝夜往來會哨沿海墩臺該所掌  
印官每處選撥軍餘五名帶馬一匹住守瞭望有警飛  
報總兵參將柘林  
等處以便策應

南滙堡 松江圖說曰本堡地形如犁狀突出洋中勢向

東南其三面皆海故謂之南滙焉倭寇每察風色分踪  
於洋山馬磧如東南風則此滙大漈口當洋山衝如東  
北風則此滙四五六團洪當馬蹟之衝蓋各堡止防一  
面而是堡三面受敵矣洪武時備倭築堡以金山衛中  
後千戶所官軍駐守嘉靖中倭入寇被陷乃設把總一  
員統民兵守禦事寧裁革把總汰存民兵止百名於該



所內挑選軍兵卽委所官操練聽川沙把總節制萬曆  
 初亦盡革民兵增軍兵另委官統操汛時督發出洋哨  
 探南至青村界頭墩北至川沙界八墩各二十五里  
 至海塘背至新場皆其信地每年汛時金山營撥陸兵  
 協守汛畢回營所官劉嘉錫議謂此堡沿海塘信地  
 南自大滬口起北抵六團洪止一帶洪窪倭船東風驟  
 息可到最為險要宜於中南北各建廠房一間汛時每  
 廠撥發選鋒哨守汛畢常川更番防禦

建置

守禦南滙胥中後千戶所在上海縣十九堡洪武  
 二十年建鎮撫司軍器局在城演武廳在南門外  
 千戶三人所鎮撫  
 一人百戶八人

官軍

官卽金山中後所分署也見在千戶四員考選掌  
 印一員城操一員鎮撫一員百戶六員分委掌印  
 一員陸路一員其餘聽差

本所旗軍一  
 千四百名

本所墩臺南自頭墩起北至川沙十九墩止共一十九  
 座每墩撥軍五名瞭望近議每墩增軍一名又設塘在  
 墩臺內自一塘至十七塘每塘置  
 舖舍撥軍二名瞭望獨本所有之

屯田糧餉

本所原派上海軍儲本色米  
 一萬一千二百六十石八斗

本所屯田三十一頃九十六畝屯田旗軍餘一百五十  
 六名田坐落上海縣二十堡原該子粒九百三十六石  
 除運糧旗軍餘五十名免一百五  
 十石實納子粒七百八十六石

本朝提督標經制額設守備一員 把總一員 有馬戰

兵四十名 無馬戰兵六十名 步守兵一百名 各



官坐馬六匹 各兵戰馬四十匹

南漕經略之要

隆慶中鄭若曾議曰南漕在上海境內下砂新場周浦八團諸鎮舊號富庶皆本所信地嘉靖倭亂乙卯為賊所戕破遂設總練官一員常川駐守於此然賊之犯上海也每自李家浜入黃浦逼臨城下南漕反在其外若能統練精兵自外衝擊攻圍亦一勝算

川沙堡

松江圖說曰本堡洪武時以非險阻原無設嘉

靖中倭入寇乃築堡撥南漕千戶一員督南漕軍五十名於汛時前來守川沙窪口而隸於南漕把總後以賊來登陸從寶山而南掠者川沙正當其衝故於此設把總一員革南漕總而反屬之設民兵千名後事平裁減

萬曆十九年以海警震鄰又調撥蘇州鎮海衛旗軍來守起造營房與居增募浙兵督同哨官管領訓練時常與吳淞營兵合營團操又以設堡孤懸而川沙窪水深岸近議令總旗分兵巡劄則往來必經南漕其策應川沙尤便耳本堡南至南漕六團五十里北至寶山六十里東至海十二里西至上海城五十里皆其信地本所千戶統領軍餘守堡又與寶山各撥兵往來會哨有警飛報總叅益川沙總屬以南寶二堡首尾互應氣勢聯而兵力壯矣附近南贍三林巡司弓兵悉聽該總隨宜調度松江守禦千戶所亦遙屬之其所屬海港如翁家

港川沙窪諸處今為要害云

官軍

設守堡千戶公署一所守禦官一員陸路官二員領兵官二員守窪官一員

本堡與蘇州鎮海衛調撥旗軍一百名在堡守禦起造營房給住又守川沙窪兵一百名此窪向撥南匯所軍五十名劄守萬曆三十年撤軍募兵時始到哨造給營房二十五間戰馬二十四匹日支草糧銀一分後裁至

一十

屯田糧餉

本堡原設營田二百八十六畝給軍佈種每畝納租七斗共租二百石二斗本堡官收貯

餘糧之外聽

本堡支銷

### 本朝歸併寶山營

### 川沙經略之要

隆慶中鄭若曾議曰舊志南匯與吳淞所互為應援然相去一百五十餘里又隔李家港兵難急渡賊至飛報

且不能達况提兵策應乎嘉靖甲寅賊據為巢與老鸛嶺柘林新場之賊合本鎮頓成丘墟丙辰亂平遂築堡以一千戶守之而隸於南匯把總然未盡算也歷年賊踪每自寶山早寨登岸擄掠而南則此堡正當其衝視南青二堡更為剝牀所設軍餘百名弓兵八十名果足備禦乎倘遇賊警把總之兵豈肯棄南匯而赴川沙乎合無移把總駐此而予卒五百戍守有事與寶山首尾捍禦庶總司不以遙制推諉而事權得行氣勢得壯誠備禦之長策後已移把總於川沙增兵劄守常事者用其議

萬曆中督撫宋

議曰川沙把總自六團起至寶鎮

堡皆其信地境屬有南匯所南踰三林二巡司沿海地方百里俱係衝要舊設民兵四百名戰馬二十四匹後以該總兵力單弱加募民兵一百六十名共足五百六十名為營督同哨官二員管領訓練時嘗與總鎮營兵合營團操該堡孤懸海邊而川沙窪水深岸近今議總兵官分兵巡劄則往來必經南匯其策應川沙尤便又添設哨探唬船四隻船兵即於陸兵內扣充仍查照金山例行貼駕軍餘於南匯所選補本所千戶帶領軍餘一百名守堡與寶山堡每處各撥兵一百名往來會哨

有警飛報總兵叅將南漚寶山堡并上海縣相為犄角  
互相聲援其巡司弓兵并南漚官軍悉聽該總隨宜調  
度

寶山堡 松江圖說曰改築後今定為駐守官軍於吳淞  
所調撥月糧於嘉定縣解給此官軍聽蘇州府統轄民  
兵兵餉於松江解給此民兵聽松江府統轄南至川沙  
六十里北至馬沙墩四里東至海一里西至吳淞所三  
十六里皆其信地也此地海沙堅硬號鐵板與浪相撼  
舟立碎倭不得泊近者吳淞之沙日漲而寶山日頽寇  
至泊舟為便且改築山墩又陡立遠眺如豎標然故吳  
淞之險移之寶山矣防禦不視昔更急耶近堡有張家

浜界浜二路通堡城久淤應濬以便運糧又議開橫港

以資田灌溉併得取土增修護塘尚未允行

官兵

官無定員係吳淞所官軍駐守造給營房聽蘇州府委官統攝又設民兵及兵船捕舵兵夫聽松江

府委官統練皆屬川沙把總

本堡設民兵五百名委總練官一員領兵官一員新議增哨船四隻每隻捕舵夫兵一十四名

本朝提督標經制額設叅將一員 中軍守備一員 千

總二員 把總四員 有馬戰兵二百名 無馬戰兵

三百名 步守兵五百名 各官坐馬二十四匹 各

兵戰馬二百匹

寶山經略之要

隆慶中鄭若曾議曰江東早寨有二一在寶山一在高橋鎮皆國初設以備倭者今廢久矣無議及修復者豈以青南當其前吳淞擁其後形勢以壯而寨兵不足為有無耶竊見此地物饒民殷賊所窺伺而守江守浦兵俱在內地青柘川南諸堡僅可遏賊於南吳淞兵船僅可遏賊於北不能顧焉况賊見南北阻截不能登犯其勢必趨之盤據為巢故嘉靖甲寅徐海屯柘林而令葉明屯此與新場陳東合為二窟藉糧於內地紛擾誰為厲階則我自失地利也今二地之中有界浜焉乃嘉上之鴻溝也宜令蘇松併築一城設兵屯戍一如常鎮孟河事例有警則二地之民攜家以入僇力死

守寇自無糧可資蓋堅壁清野之長策也  
萬曆中督撫宋 議曰寶山堡南自徐家溝北至老鵝嘴止一帶俱為險要且寶山突然為海標識倭舶乘風而來勢必趨此雖去吳淞大營不遠然阻隔黃浦聞警調兵卒難濟度舊時春汛於總兵標下分撥陸兵二百名加募民兵一百名委指揮一員統領防守然城堡窄狹又失地形兵力單弱甚為可虞今議改築堡城三里并遷吳淞協守所官軍移守新城山上加築墩臺以便瞭望以壯聲勢仍建造官廳營房每汛時總兵官帶

陸兵駐劄城內屹然為一方巨鎮不惟要隘有備且南漕青村一帶接應更便汛畢各兵仍回總鎮合營團操

營堡墩塘

黃浦營

本朝新設經制叅將一員 中軍守備一員 千總二員

把總四員 有馬戰兵一百二十名 無馬戰兵一

百八十名 步守兵三百名 水守兵二百名 各官

坐馬二十四匹 各兵戰馬一百二十四匹

金山營 守備官一人 軍四十人

胡家港堡 守備官一人 軍四十人 歲撥貼守旗軍百人

蔡廟港堡 守備官一人 軍四十人 貼守官軍三百五十二人 歲於太倉鎮海二衛調撥以二月初一

日來十月初一日  
去凡貼守者做此

獨樹營堡

守備官一人軍四十人貼守官  
軍一百一人嘉興于戶所調撥

江門營

守備官一人  
軍四十人

墩塘凡六十七座每墩一座瞭守軍士五人塘一座瞭

守軍士二人塘者置舖舍於護塘之側也

陸鶴墩

周公墩

滌缺墩

俱在蔡廟港迤西捍海塘  
北皆建衛時築正統間翁

紹宗以烽墩疎  
復築塘以間之

右隸左所為塘二

胡家港墩

東新西新一墩

舊址嚙于海弘治二年同  
徙捍海塘北俱在曹涇市

南海

右隸右所為塘二

金山墩

在捍海塘北

戚家墩

舊在捍海塘南今徙于北

篠館墩

舊係土築

正統庚申總督盛琦以磚石甃之加增二  
層建烽樓圍心如牆今改呼為瞭望臺

甲午指揮侯寅甃以磚  
石西有水曰橫樂故名

橫樂墩

成化

右隸前所為塘二

江門墩

葛蓬墩

新廟墩

俱在衛西海上天  
順年間甃土以石

右隸後所為塘二

東西袁浦二墩

在柘林袁浦鹽場南海上洪武二十三年土築

橫林墩

戚

滌墩

朱家浜墩

大門墩

洪武庚午嚙  
于海徙之北

椒樹墩

洪武

庚午嚙于海  
徙捍海塘北

神廟瞭望臺

舊名頭墩在捍海塘外亦  
淪于海天順元年徙廟之

東北四年甃以磚石易今名

二墩

自此至五墩俱洪武庚午築

三墩

四墩

有新舊二墩皆在青村東北捍海塘外初四五墩相去太遠增築一墩故有二名

五墩

右隸青村中前千戶所為塘十七

一墩至五墩

五墩名瞭望臺正統七年翁總督改今名

六墩至九墩

擒

虎墩

正統丁卯墩為三虎所據指揮同知侯端率眾先登手殺虎并其二子人異驍勇遂以名墩今廢

十墩至十三墩

郭公墩

在清水窪南木窪雲間舊無成化十六年郭總督以

海盜劉通為患及甃艘私販出入二窪委官軍築之初名新墩後郭去人私其惠易今名

十四墩

在張家灣

十五墩

在秦家壩

王公墩

下有大水日楊家洪口私販鹽船出入之所正

德元年王總督憲以崇明沙民施天泰作亂委官軍築之舊名新築墩王去易今名

十六墩

在曹家溝

家溝

十七墩

在王家溝

右隸南匯中後千戶所為塘十七

按海隄之外設墩臺每座置舖舍一所派以軍餘原額王人萬曆間增為六晝夜瞭望海洋聲息汛時以二月十六日上班帶馬一匹遇警飛報其後軍門條議有日墩臺之設將以申嚴斥埃使警報連屬不特為觀眺之具而已今照各墩軍每遇上司按臨巡視鳴鑼哨迎虛應故事及平日各散為家既不瞭寇于外洋抑且因教以悞事宜行令副總兵官置立紅頂籌十二根遊擊官置立綠頂籌十二根上寫子丑十二支字號按時給發往來遞傳周而復始則海塘氣脉無頃刻停滯有警立聞矣是在有事之日更當嚴飭者也

邊海內外設備之方

前知府方廉議曰松江府自金山衛至南匯所官軍各分信地各有定額如金山衛以西守禦獨樹江門二營舊制各設官軍四十名又貼守兵共一百名金山衛金山營胡家港堡蔡廟港堡舊制各設官軍四十名又貼守軍共三百五十二名已上正守軍人係金山衛查撥貼守軍係太倉鎮海二衛嘉興千戶所調撥每歲二月

上班十月掣班青村以東各浜港舊制以青村官軍把守南漚以北各浜港舊制係南漚官軍把守今查修復海塘須照舊分派但太倉鎮海嘉興同有倭患貼守官軍似難調撥相應于金山青村適中如柘林地方南漚吳淞適中如七八團地方添設陸路把總二員各領精兵一千暫借民居劄營隨路有警相機策應此松江海塘設備之大略也若沿海港口金山以東有翁家港蔡廟港滌缺柘林等處南漚以北有四五六七八九團洪口川沙窪清水窪等處宜設船防守按舊制金山衛所造船各有定額左右前後所每百戶所造出海哨船四隻計八十隻俱就各衛所派撥巡軍在海巡邏正統間海患寧謐或以船為虛費題准沿海用馬而哨船之制遂廢矣今議設船隻一馬之資不足以備一船之用官軍窳苦又難賠贖合令每馬二匹造船一隻再於衛所查有地租公費銀兩與松江府庫軍前銀內相兼贖數每船量貼銀十兩金山衛總委一官督造其各船應用器械火器合於原議太倉置造軍器內給發聽用就點各衛所知水軍人操習水戰布列港口各分信地如倭賊突至而敢容其停泊者服以上刑則自無規避之患矣

此松江海港設備之大略也夫沿海設備固為上策萬一外守不固則黃浦一帶又為松蘇險要守浦乃所以守門戶猶有愈於守城也今吳淞江口即為黃浦口子既經設備而吳淞江所亦設兵一枝以防深入矣至于上海之高倉渡沈庄塘周浦開港閔行華亭之葉謝曹涇張堰等處賊一登岸搶船渡浦甚易除松江先後打造雙塔船鷹船各船發上海華亭召募木兵分布沿浦各港巡邏把截又華上二縣各募鄉兵護守城池有警調至浦邊協守但前項兵夫官無專職則事難責成而沿浦二百里之遠本府巡捕官一人勢難管攝合令清軍同知一員帶管華亭鄉兵木兵自風涇以至閔行皆其信地再設巡捕同知一員住劄上海專管該縣鄉兵自閔行以至嘉定界首皆其信地無事率兵操演有事統兵防守此松江內地設備之大略也然倭船之來乘風渡海勢難聯絡每至海外大山必停船候齊然後深入照得羊山為本府所屬為定海吳淞江二總兵兵船會哨之處以地里適均故也本府所造之船數本不多僅可以支把港之用此但可以言守而不可以言戰須得福船蒼山各數十隻沙耆民船二三百隻每至風汛時月分泊港口各住信地更番出至羊山往來遊擊晝



夜不絕外則為定海吳淞江會哨兵船之羽翼內則為海港把守兵船之捍衛遇有海賊齊力奮擊賊踪散而少我船綜合而眾盛衰之氣勢既分則勝負之分數自判得海防之上策矣又查得沿海民竈原有採捕魚蝦小船並不過海通番且人船慣習不畏風濤合行示諭沿海有船之家赴府報名給與照身牌面無事聽其在海生理遇警隨同兵船追勦則官兵無造船募兵之費而民竈有得魚捕盜之益此松江海洋設備之大略也巡撫翁大立疏曰周行海疆分布信地視吳淞所乃水陸之要衝蘇松之喉吭也提兵南向可以援金山之急揚帆北哨可以扼長江之險以副總兵鎮之自吳淞而北為劉家河為七丫港又東為崇明縣七丫而西為白茆港為福山又折而西北為揚舍為江陰為靖江又西為孟河為圖山此皆舟師可居利於水戰臣皆設有兵船非統以把總卽統以指揮而又以圖山遊兵把總駐劄營前沙會哨于江北吳淞遊兵把總駐劄竺泊沙會哨於羊山常鎮叅將統水陸兵據江海之交鎮守于揚舍所以備水戰者亦既密矣但吳淞而南雖有港汊每多砂積賊可登岸兵難泊舟非選練步兵循塘距守以出中策不可也今自吳淞所而南為川沙堡以把總練

兵一枝守之川沙而南為南匯而西為青村所以把總練兵一枝守之青村而西為柘林堡以都司練兵一枝守之此皆不遠六十里聲援易及首尾相應宛然常蛇勢也柘林而西為金山衛西連乍浦東接柘林頻年皆賊巢窟添設遊擊將軍一員統領馬捕遊兵往來遊徼則北可以護松江而西可以援乍浦職方攷鏡蘇松為畿輔望郡瀕于大海自吳淞江口以南黃浦以東海壖數百里一望平坦皆賊徑道往往故不能禦之于海致倭深入二府一州九縣之地無不創殘其禍慘矣今建議松江之有海塘而無海口者則自上海之川沙南匯華亭之青村柘林乃賊所據為巢宜各設陸兵把總屯守之而金山界于柘林乍浦之間尤為浙直要衝持設總兵以統領又添遊兵把總專駐金山往來巡哨所以北衛松江而西援乍浦也至于蘇州之沿海多港口者則自嘉定之吳淞所太倉之劉家河常熟之福山港凡賊舟可入者各設水兵把總堵截之而崇明孤懸海中尤為賊所必經之處特設叅將以為領袖又添遊兵把總二員分駐竺泊營前二沙往來會哨所以巡視海洋而警報港口也內外夾持水陸兼備上可以禦賊于外洋下可巡哨而相守亦既精且密矣





但調募客兵不如練土著之兵可馴習而有常官造戰船不如催民造私船反堅久而省費是在當事者酌行之而

海防志曰青柘南川達于寶山延袤二百五十餘里一望平陸隨處可登其川沙窪水深丈餘翁家港雖淺然潮漲即可泊岸二港最深危急各該信地雖設兵往來巡哨第恐風雨晦冥之時巡兵各歸信地而二處港口萬一有警悞事匪輕舊規南匯撥兵五十名委官一員帶領專守川沙窪青村撥兵五十名委官一員帶領專守翁家港俱聽委官約束委官聽該總約束遇警馳報各路官兵合勦每年春汛依期選撥汛畢歇班李家洪孤懸海口東至寶山六里東北至吳淞所一十二里此口間隔在寶山吳淞所之中兩難照顧賊若乘潮突入不移時直抵上海城下豈可不預為之地近議大汛時吳淞所撥兵一枝哨守如遇有警聽總鎮提兵勦截而寶山兵亦星馳夾擊庶幾得策矣翁港離羊山僅隔一水之遙島嶼望港門為便昔年倭從此登岸故議兵防守今海沙泛積人呼為滙背益稱

險地募浙兵五十名委官一員統練守之

川沙當羊山一帶水勢滌澗亦昔年倭所從登因據川沙為巢萬曆十九年又倭踪特犯故議復窪兵一百委官一員統練守之

清窪深澗內可泊船連年海盜于此登劫應如昔年特造南北厥川沙寶山撥兵上海嘉定出餉以守之李洪萬曆中海潮衝成大口吳淞之險移於是矣題設沙船五十隻未幾改調別用海塘相傳其初相度形勢取礮糠浮水趁其漂射之跡築之古張儀取蜀以龜之形跡築城名龜城即此意也初制原自一團起至九團止護塘內外有濠濶四丈深一丈五尺每一團設弔橋一座聽民出塘生理官軍瞭望如有賊即弔橋擊去距塘而守遠可攻以箭砲近可刺以戈矛護塘之上每一橋造窩舖三間以為鄉兵止宿守瞭之所

江南經略曰海塘西起金山東並南匯北抵吳淞其間窪口多故賊易登岸沙塗遠故我兵難泊舟明初原設



塘濠因而增築庶易防禦

### 海防備禦訓練之宜

海防之策有二曰禦海洋曰固海岸何謂禦海洋會哨陳錢分哨馬蹟大衢羊山遇賊要衝是也何謂固海岸修復備倭舊制循塘拒守不容登泊是也總督胡宗憲云防海之制謂之防海必宜防之于海斷乎以禦寇羊山爲上策其言是也蓋蘇松事體與福浙不侔夫倭船之來必由下八山分踪若東南風猛則向馬蹟西南行過韭山以犯閩粵若正東風猛則向大衢西行過烏沙門以犯浙江若東北風猛則向殿前羊山過淡水門以犯蘇松羊山在金山之東大七小七之外吳淞江順帆不過一潮而已其爲賊之要衝雖與馬蹟大衢相若而淡水門捕黃魚一節乃天設此以爲蘇松屏捍豈可謂遠洋備禦之難而以羊山與馬蹟大衢例論哉蓋淡水門者產黃魚之淵藪每歲孟夏潮大勢急則推魚至塗漁船于此時出洋撈取計寧台溫大小船以萬計蘇松沙船以數百計小滿前後凡三度淡旬之間獲利不知幾萬金故海中常防劫奪海漁船必自募久慣出海之

人以格鬪則勇敢以器械則鋒利以風濤則便習其時適當春天之時其處則又倭犯蘇松必經之處賊至羊山見遍海皆船而其來舟星散而行以漸而至勢孤氣奪必遠而他之敢復近岸乎不募兵而兵強不費糧而糧足不俟查督而自無躲閃之弊三利存焉此在他處皆無而惟蘇松洋有之豈非天生自然之利也哉或問約束之法奈何曰邇來漁船出洋輔以兵船相須而行協力而戰取甘結給旗票謹盤詰驗出入船回之日當道委官抽稅以助軍餉此法必不可行也何也漁船專欲覓利兵船專司擊賊其志不侔其力不協况所稅能幾何而欲分其所有也哉莫若兵船專于把港勿用出洋但令願捕漁者籍名于官立首領編旗甲保以耆民示以盟約如殺賊而有功也照例陞賞永許採捕若縱賊近岸則一體坐罪永不許其出洋凡漁利與所獲賊資悉以畀之如此則漁人皆以禦倭爲己責感恩畏罪捨死直前豈不愈于專督兵船邪然吾郡所設松江海防又與蘇州不同松江有海塘而無海港其設備也以陸兵爲主蘇州有海港而無海塘其設備也以水兵爲主何謂有海塘而無海港蓋松江之海起于獨山而迄于小湯窪迢迢二百四十八里皆有護塘爲之限隔高

厚如城別無港汊可以通海護塘之內外相夾皆水也  
在內者謂之運鹽河又謂之橫港在外者謂之塹濠又  
謂之護塘溝昔人所以築此塘者為捍鹽潮恐其害苗  
也明初用為金湯以備倭患設衛所墩堡于塹濠之外  
倭至則捍禦于海岸灘塗不容登泊萬一不支則踰塹  
而守倭進不得攻退無所掠護塘之功用豈小小哉邇  
年塹濠多湮護塘海岸合為一片寇至即聚于護塘而  
運鹽河之內水田狹隘難于屯禦為今之計必須浚治  
塹塘不復衛所墩堡之法選陸兵委知兵叅將精練于  
平時遇汛則分布信地協守互援無容登岸則松江海  
防庶幾其無悞乎

禦海洋之說有言當泊舟于外洋山島分乍浦之船以  
守海上羊山蘇州之船以守馬蹟定海之船以守大衢  
則三山品峙哨守連聯可扼來寇者總督胡宗憲也有  
言文臣不下海則將領畏避潮險不肖出洋合無春汛  
時令蘇松兵備暫住崇明寧紹兵備暫住舟山而總兵  
官嘗居海中嚴督會哨者中丞唐順之也有言聚船于  
馬蹟山以為諸路水軍老營仍于羊山設水營以扼賊  
入乍浦川沙窪由吳淞江口入蘇松之路于大衢山設

水營以遏賊入寧波溫台之路專設海上總兵特造出  
海大艦如古拏飛艦飛虎艦戈船樓船將軍之制仍大  
申出洋之令修復大詩風尖八槳等船以便行使者尚  
書馬坤也有言守海者必先設險于險之外守之所謂  
海戰之重兵必治戰船備火攻而謹斥埃迎擊于沿海  
之上賊未泊岸則為夾水而陣以遮擊之賊既登岸則  
當隨其賊艘所泊之處而直搗之是謂海上格鬪之兵  
副使茅坤也但海中無風之時絕少一有風色即白日  
陰霾且颶風時作全軍往往覆沒雖以元世祖之威伯  
顏之勇驟衝千里皆為魚鱉則海戰亦未易言也故鄭  
若魯云哨賊于遠洋而不常厥居擊賊

于近洋而勿使近岸兩言頗為知要  
海中以風潮為主水操之法欲進則進欲退則退欲轉  
折則轉折回翔如飛橫風鬪風皆能調餞者惟沙船也  
其次則蒼艫之類帆櫓兼用亦可操演若廣船福船皆  
不設櫓所恃者帆耳其船重大順風而往逆風即不可  
回乘潮而往逆潮即不可回進退轉折皆非所便也將  
欲操之于內港歟則又港形甚狹潮勢甚迅兵船操者  
甚多大船順風其迅如矢向前衝擊舟遇即碎故斷斷  
不可行惟募柁工得人尊上風施火器或迎而犁或尾



而追或合而圍或橫而衝總副  
參遊注意遴選賞罰則可耳

松郡稱水鄉邊則大海腹則泖浦尤不可不習水操法  
然古今論操法戰法皆詳于陸地而略于江海以風潮  
為主分合進退難也勝之之法惟有鬪船力不鬪人力  
如遇賊舟之小者則以吾大舟犁而沉之遇賊舟之大  
者則使調敵奪上風用火器以攻之當前衝敵者一舟  
之人皆賞觀望不應援者一舟之人皆戮其賞其戮尤  
以督哨之人與舵工為重每船必設舵二副以備不虞  
每舵工必設二三人以防損失此戰之之法也其在平  
日置船于陸地上集水兵演而教之兵械火器如何而  
設施金鼓旗幟如何而照會前後左右如何而列哨儀  
飽勞逸如何而更代晝夜風雨如何而防守山島沙磧  
如何而收泊號令約束如何而轉報習之于平陸用之  
于江海此操  
之法也

奚秋蟾云海中有風時多無風時少舟易散而難聚且  
逐潮勢而行若風猛潮平則以風為主潮勇風微則以  
潮為主風潮皆逆則回船向後而行風潮順則一瀉千  
里每日所行程途之數與東西朔南方向皆不可料敵

船亦然故吾行若干里敵亦行若干里愈追愈遠愈求  
戰而愈不得况兵船分行大海渺茫有與我相望而見  
者有不可望見者昏黑之夜起火為號則隱隱見之然  
亦不能辨其為賊船與我兵船也有時遇賊欲戰而吾  
同哨離遠則勢孤有時隣哨相近敵舟又遠難于攻擊  
有時我兵遇合敵舟亦近可以戰矣而風或大作舟在  
浪漕中低昂起伏方欲仰而攻敵瞬眼之間吾舟忽擡  
高一二丈敵舟反在下矣船出浪漕之時船首向天落  
漕時船尾向天兵士竚立且難况戰乎亦有風不甚猛  
而怒濤為虐兩舟相擊即碎亦不敢戰惟是舵工巧妙  
能戰上風撞碎賊舟或乘風火攻或揚灰沙以迷賊目  
方得勝勢所患者一舟衝前而餘舟不至或一哨接戰  
而餘舟不至或一哨接戰而餘哨不援方其戰時或兵  
四散遠望麾旗而招之弗顧也張號以呼之弗聽也戰  
敗則終不禁戰勝則聚而分功及責之則托諸風帆不  
便今又皆傳海戰利用火箭與銃砲弓弩殆非也火箭  
惟微風可用若無風則帆不可焚風急則火亦反熄皆  
無益也銃砲弓矢因舟蕩漾發去無准皆虛擲于浪中  
鎗鈹之類亦無用惟鏢鎗鈞鈞三件舟在上風者  
以撓鈞鈞住下風之舟以鈞鎗鈞鈞扯賊人之足以鏢鎗

鏢射賊人之身  
胥為有用之器

附海船。武經總要曰：凡水戰以船艦大小為等，勝人多少皆以米為準，一人不過重米二石，帆櫂輕便為上。以金鼓旗幡為進退之節，其戰則有樓船鬪艦，走舸海鶻。其潛襲則有艨艟遊舸，其器則有拍竿為其用，順流以擊之。諸軍視大將之旗，旗前亞聞鼓進則旗立，聞金則止，旗偃則還。若先鋒遊奕等船為賊所圍，以須外援，則視大將赤旗向賊，點則進，每點一船進；旗亞不舉則戰，船徐退，旗向內，點每點一船退。若張疑兵，則于浦海廣設旌旗檣帆以惑之，此其大略也。

遊艇無女牆，艖上槳，船左右隨艇子大小長短四尺一牀，計會進止回軍轉陳其疾如風。虞侯用之，夫拍竿者施于大船之上，每艦作五層樓，高百尺，置六拍竿，並高五十尺，戰士八百人，旗幟加于上，每迎戰敵船若逼則發拍竿當者。

船舫俱碎。艨艟以生牛革當戰船背，左右開製，掉空矢石不能敗。前後左右有弩窓，矛穴敵近則施放，不用大船務在捷速，乘人之不備。

樓船船上建樓二重，列女牆，戰鬪樹幡幟，開弩窓，矛穴外以氈革禦火製砲，播石鐵汁狀如小疊，其長者步可以奔車馳馬，若遇暴風則人力不能制，不甚便于用。然施之水軍不可不備，以張形勢。

走舸船舷上立女牆，掉夫多戰卒，皆選用勇力精銳者充之，往返如飛。鷗乘人所不及，金鼓旌旗在上。鬪艦船舷上設女牆，可蔽半身，牆下開棹孔，船內五尺又建柵與女牆齊，柵上又建女牆，重列戰士，上無覆背。前後左右豎牙旗，金鼓。

海鵝船形頭低尾高前大後小如鵝之形舷上左右置浮板形如鵝翼翅助其船雖風濤怒漲而無側傾覆背左右以生牛皮為城牙旗金鼓如常法

已上俱古制

福船高大如樓可容百人其底尖其上濶皆護板護以茅竹豎立女垣其帆桅二其中為四層最下層不可居惟實土石以防輕飄之患第二層為兵士寢息之所地樞隱之須從上躡梯而下第三層左右各設水門置水樞乃揚帆炊爨之處也其前後各設木錠繫以棕纜下旋起旋皆于此層用力最上一層如露臺須從第三層穴梯而上兩傍板翼如欄人倚之以攻敵矢石火炮皆俯瞰而發賊又難于仰攻誠海戰之利也 戚繼光曰福船乘風下壓如車碾螳螂鬪船力不鬪人力每每取勝若使賊船相等未必濟也且喫水一丈二尺惟利大洋不然多膠于淺無風不可使是以賊舟一入裏海沿淺而行則福舟無用矣故又有海滄之設

廣船視福船尤大其堅緻亦遠過之蓋廣船以鐵力所造福船不過松杉之類而已二船在海若相衝擊福船

即碎不能當鐵力之堅也故倭船亦畏之但廣船難調不如調福船為便易廣船若壞須用鐵力木修理難乎其維且其制下窄上寬狀若兩翼在裏海則穩在外洋則動搖此廣船之利弊也

黃魚船非以禦寇也每年四月出洋時各郡魚船大小以萬計人力則整肅器械則犀利唐公順之捧敕視師約軍門每府魚船若干輔以兵船若干相須而行協力而戰取甘結給旗票謹盤詰驗出入船回之日該府差官收稅于軍餉大有助焉黃魚出處惟淡水門在羊山之西兩山相峙如門故曰門羊山在金山東南大七小七之外今漁船出海皆在松江滙缺口孟夏取魚時繁盛如巨鎮然亦須候潮潮大勢急則推魚至塗否則無有蓋月出潮長月沒潮落月直潮平月斜潮退此利素為沙船所占夫羊山淡水洋乃倭奴入寇必經之道黃魚出時乃春汛倭至不先不後之期此殆天意有在假手于山沙精悍之人出捍吾邊鄙柔脆之民焉天特地利人力三者兼得亦東吳禦寇之一策也

沙船沙民生長海濱習知水性出入風浪履險若平但此船惟便于北洋而不便于南洋亦僅可以協守各港

出哨小洋而不可以出大洋雖能接戰而上無壅蔽火  
 器矢石何以禦之不如鷹船兩頭俱尖不辨首尾進退  
 如飛其傍皆茅竹板密釘如福船傍板之狀竹間設窓  
 可以出銃箭窓之內艙之外可以隱人盪槳必先用此  
 衝敵入賊隊中賊技不能施而後沙船隨後而進  
 短兵相接戰無不勝鷹船沙船乃相須之器也  
 王在晉類述云福船之小者為草撇船今名哨船又為  
 海滄船今名冬船其再小者為蒼山船卑隘于廣福船  
 而濶于沙船用之衝敵頗便溫人呼為蒼山鐵船賊船  
 入裏海我大福海滄不能入必用蒼船追之又可撈取  
 首級近又改蒼山船制為幢艦船比蒼船稍大比海滄  
 較小而無立壁得其中制幢艦之稍次者為鐵頭船首  
 尾皆濶帆櫂並用深淺俱便人呼為鐵頭以其堅而有  
 用也閩人將草撇蒼船改造鳥船式如草撇兩傍有櫂  
 六枝尾後惟稍櫂二枝不畏風濤行使便捷往來南北  
 海洋福草蒼船等船無出其右溫州有艚船亦不如  
 鳥船之疾速可與沙唬船並駕焉唬船頭尖稍銳船濶  
 槳多風順揚帆風息盪槳喫水惟止三尺慣走遠洋體  
 式低小雖無衝犁之勢進退殊捷可備追逐之需閩浙  
 有叭喇唬船兵夫坐向後而掉槳其疾如飛有風豎桅

用布帆槳斜向後准作偏柁亦能破浪甚便追逐哨探  
 倭號曰軌帆蓋懼之也輪船式如唬船而與唬船並速  
 開浪船式如鳥船

而此鳥船差小  
 兵船之能任重者為蜈蚣船東南蔡用以駕佛狼銃銃  
 重千斤小者亦百五十斤葛稚川曰蜈蚣之氣能逼蛇  
 彘之制義

為是故與  
 殼哨船為溫州捕魚船網梭船乃漁船之最小者魚船  
 于諸船中制至小材至簡工至約而其用為至重以之  
 出海每載三人一人執布帆一人執槳一人執鳥嘴銃  
 布帆輕捷無墊沒之虞易進易退隨波上下敵船瞭望  
 所不及是以近年賴之  
 取勝擒賊者多其力焉

松江府志卷之二十一終

松江府志卷之二十一

倉廩

府之有倉廩所以廣儲蓄戒不虞也前代之制詳矣簡而且備莫若我文襄周公安肅趙公所以為吾郡計者雖世守可也今具列之

顧志

松固財賦重地也司詹之事視他郡宜詳但曩時倉庾十九濟民今所重者獨水次漕兌一倉耳追書而備列之後之君子或睹其名而興舉焉

華婁兩縣水次倉

俗稱西倉

在府西五里古浦塘之南明宣德

八年巡撫侍郎周忱建先是於各鄉要會處置倉分受



松江府志 卷之二十一  
民間委輸以革鄉胥多取之弊然統紀不一乃建此倉  
及南倉凡府以東之稅輸于南倉以西者輸於西倉漕  
舟至就倉給發公私便之後南倉廢皆歸併于西倉而  
積貯之寄愈重矣嘉靖間築倉城萬曆己未華亭知縣  
章允儒建官署隨于官署左右建官廩崇禎間知府方  
岳貢開十字河增築城垣又令士民附倉居者皆得構  
廩房賃民貯米但糧多廩少每歲開倉諸兌役皆借附  
城民廩貯米候兌名曰棧房

國朝順治間奉憲檄禁止私棧凡漕米皆入倉城官廩是  
年遂派各屬增造廩房三百餘間每十間以上爲一聯

瀕河北櫛無隙地時婁縣初建兩邑之米皆入倉城頗  
以爲便然每歲冬春倉城外漕艘駢集羣卒聚焉整肅  
漕綱端有賴於彈壓者

水次南倉在府東南五里官紹塘上與西倉同建尋廢  
西新倉在西北洪武三十二年建尋廢

預備濟農倉在府西南舊僊鶴觀基也明洪武初於此建  
太平南倉後改爲中千戶所倉宣德壬子巡撫侍郎周  
忱奏行平糴勸分之令積其米於軍儲北倉以備賑濟  
正統戊午革中所倉辛酉知府趙豫卽其址建廩四十  
間始定今名先是分建預備倉四所於八保之葉謝四

十二保之金澤七保之蓋家莊三十五保之七寶鎮至是俱廢嘉靖中建徐文貞階賜第乃改倉于軍器庫在縣學之西南萬曆二十七年知府許維新知縣張繼桂支庫銀千兩造厥房壹拾捌間收取各憲并本縣額積紙罪穀一千四百石每歲開送巡按御史闈一吏帶管每石定價二錢五分外扣脚銀二分五釐貯庫秋成之際差委員役往上海糴穀還倉著為令萬曆四十七年知縣章允儒復議署丞顧正心捐助貼役義田漕糧三千餘石貯倉聽候兌軍是時漕綱甚肅而濟農紅單米交兌尤便崇禎間兌務皆併入西倉濟農米亦無復存

留者入

國朝厥房尚存間貯本色兵糧克地方官兵之用

明胡儼濟農倉記 民者國之本農所以養民也昔厲山氏之子曰農能殖穀後世人名耕者為農農本濟民今日濟農何也民農一耳食者民而耕者農四民之業食者眾而耕者貧耕者貧不有以濟之則民何由得其養哉為政者孰不欲濟農然得共道者鮮得其道而農獲其濟者今吾於松江之為政者見之吳松所統華亭上海二縣其地不過二百里而田賦百二十餘萬石視他郡為特重每歲春夏農之貧者必舉債而後能力作幸而有秋則先償私貸然後及公賦公私既輸而農則貧矣農貧復假貸或鬻子女或棄本業日殫月削積貧至困如火銷膏不獲其所者可勝言哉保定趙侯豫來為郡深以為憂適工部侍郎盧陵周公忱巡撫至郡趙侯白其事周公默識之然郡無宿積愛莫能施宣德七年秋東吳歲稔會朝廷命下平糴勸分以備賑卹於是周公乃與趙侯協謀而力行之得米六萬石分貯於華亭上海名其倉曰濟農明年歲侵松江饑民二十餘萬

計口者五十餘萬乃盡發所儲以賑之民乃獲濟周公復思廣爲之備乃下令瀕水立場凡輸賦者民自發運不入里胥之手視舊所輸減三之一公又與趙侯謀曰部歲徵北京將帥祿俸轉輸南京給之計其所費每米六斗致一石彼能受於南京獨不可受於此乎若來此給之便且以省費之米儲濟農倉農可無憂矣趙侯曰善非公莫能爲也公遂言於朝而松江得省米十五萬石并以各場之贏及平糴所貯凡二十一萬餘石公曰是不獨濟農凡運輸有損負者及築隄防而力役者亦借給之民不失所矣是冬朝京師以其事咨戶部以聞如其請下松江廣二縣之倉以貯焉其帳籍出內則擇官之廉能與其民之賢者掌之每春夏之交施散以時斂不踰歲凡其條約皆公所畫而蘇常二郡制同於松可謂勤恤民隱經綸變通與民宜之者也逾二年郡又旱大發農倉以賑貸而民不知飢乃相率詣趙侯請曰吾民往時歲豐猶窘衣食者迫于債責也今遇凶荒得免飢阻不至流殍此實周公之惠我公協贊之力也苟得文字載之貞石以傳世示後則二公之良法美意吾民永有賴焉趙侯於是屬翰林編修郡人楊珙寓書以耆民杜宗恒所述本末請爲之記噫予昔以文事

仕于其土于今四十九年矣於其父兄子弟固不能忘情而侍郎周公又余故人重以趙侯之請豈得無言也哉周官大司徒掌荒政十有二其曰散利貸種也洪範八政總之曰農曰農厚生也農倉之設豈非貸種厚生之遺意乎其與前代常平義倉同一養民而尤切者也故曰積貯者天下之大命而君子爲政以恤民爲報國二公之事皆可書于故史官也用著其實以告來者前史官贊治少尹國子祭酒兼翰林侍講嘉議大夫太子賓客致仕豫章胡儼謨賜進士出身中憲大夫行在詹事府少詹事兼翰林院侍講學士兼修國史臨川王英書丹甲憲大夫行在大理寺少卿邑人沈粲篆額明顧清曰文襄安肅二公所以成立此倉其難如此八十年來有備無患仁人之爲民利也博矣近歲乃有倡爲監守殃民之說以便其私者日月耗蠹遂以蕩然已巳庚午之蓄流殍盈途官司束手方是時得二公之所以殃民者僅存一二亦身得至此而世之苟利一時欲輕變前人之法者尤未已也嗚呼其亦弗思也哉清又聞父老言景泰間官司賑濟有多申而少給者當時識者謂此事從昔所未聞自此人始若有鬼神此人必無後已而果然并志以爲將來告

軍儲北倉在府西普照寺後凡府縣官吏及守禦官軍俸糧積貯於此明洪武元年建崇禎間衙舍尚存今廢義役倉在濟農倉垣內為厰十間建置歲月同凡織造軍需馬役等費於此支給今廢

儒學倉三所府縣各在本學並明洪武十五年建前代學皆有田以供師生廩食及繕修之費至是悉從官給始設倉以處之近歲事從簡便俸廩率於軍儲或水次倉按月支請學倉為具文矣

上海水次倉二所一在縣南二里一在縣西唐行鎮北並明宣德八年巡撫侍郎周忱建嘉靖二十九年在縣南

者圯壞知縣喻顯科重建其在唐行鎮者今隸青浦改稱太平倉

新倉在縣南十六保明宣德中廢

預備濟農倉在縣南二里明宣德癸丑巡撫侍郎周忱奏設正統癸亥府通判潘俊知縣張禎縣丞蔣文凱建舊所建長人海隅高昌鄉四預備倉高昌有兩倉至是俱廢嘉

靖三十二年毀于倭寇四十二年知縣黃文煒改建于縣城內海防廳東

黃文煒記畧 江南之賦甲天下惟蘓松為最繁蘇松之田稱為獨腴惟上海為最瘠率藉農力以耕之農病則賦因之矣故儲備以濟農者所以植國之賦也上海故有濟農倉去縣治二里許宣德六年為巡撫周文襄



公奏建正統間前令張君禎奉部符更今名自倭寇難作上海首蒙其禍倉被火遂鞠為瓦礫場燁來吏上海謀於眾曰倉弗復建不可因故地為之又不可乃請於巡撫都御史周公御史陳公建於城之西南隅隙地凡故所陳穀民罰贖金所易穀舉邑之議助穀悉貯之於倉將以求不失文襄公遺意也遂為記

義役倉在濟農倉垣內明宣德乙卯知縣方佐建今廢

青浦縣太平倉在北門外卽上海縣之舊水次倉也

濟農倉在北門內積貯稻穀以備賑恤舊設斗級一名專

管出入今裁革以縣吏帶管每年依例積穀六百石

軍儲南倉卽廣盈倉在金山衛以受本衛官軍俸明洪武

二十年建

廣積倉在青村千戶所明洪武二十年建

廣濟倉在南滙觜千戶所明洪武二十一年建

附古倉

宋濟民倉在今府治西南舊西湖之東北嘉祐八年華亭

知縣殿丞袁晋材建

宋常平倉在今府治南一百五十步元祐元年建乾道八

年併入濟民倉以為支鹽官廨後廢

宋轉般倉在亭林市乾道八年置

宋平糴倉端平間知縣楊瑾建

宋劉克莊平糴倉記 環吳會為邑者百數以華亭為大詣銓曹注令者千數以華亭為難琴堂常虛席莫敢就有就者世輒目以奇才予行四方聞某縣蠲某賦某縣革某弊昔難而今易者往往有之而華亭之難自若

蓋竭一縣財粟盡輸之州通天下之縣皆然至於學也  
 倉也與社稷並而不敢廢雖甚凋陋猶存其名惟華亭  
 併常平義倉之名而廢之噫其難至是歟餘姚楊君瑾  
 奉辭書縮銅墨境內稱治上下信服君喟然曰吾儒者  
 也受子男之封任芻牧之寄詎可以善事上官不得罪  
 巨室為職業于去歲夏五民苦貴糴邑無粒粟歛於諸  
 豪吾心愧焉會常平使者曹公幽修舊法太守趙公與  
 憲奉新書歲留米五千石於縣華亭於是乎有義倉若  
 日二公所以惠吾縣者至矣然歛散之權令不得專吾  
 將有以輔之取樽節餘錢一萬緡糴三千石規縣東為  
 屋五楹別儲之華亭於是乎有平糴倉昔王介甫嘗恨  
 士大夫不能講先王之意以合於當世之故余每歎其  
 言之善而又病其太高夫常平創於漢義倉昉於隋士  
 大夫不能講漢隋之法以合諸當世者有之矣泥遠而  
 及於先王之意歟顧壯哉縣生齒之繁貴豪之眾水旱  
 凶荒之備一日不可闕者相承百年莫過而問必待下  
 有賢令上有賢監司太守而後舉行然則民之望治不  
 其愈難歟君既在端平循吏之日滌華亭難治之謗薦  
 墨交上有旨陞擢暮月之間績狀如此使盡其才而究  
 於用其可書者何止一倉余又將秉筆以俟端平二年

八月旦日朝散郎樞密院編修官兼權右侍郎官劉克莊  
 莊記 朝散大夫監行在都進奏院何處信書并篆

宋西鹽倉在舊西湖東乾道八年併入北倉置浙西茶鹽

分司元為浙西鹽使司元貞初罷

元張之翰浙西鹽倉記 自煮海鬻筴鹽利不容廢置  
 場籍戶鹽禁不容弛蓋有產則有積有入則有出亦變  
 通之權便益之法也故倉不得不設松江古華亭邑枕  
 江負海厥土廣瀉牢盆之贏實百他郡後陞為府仍司  
 浙西鹽鹺併浙江東錢清西興及江北六場隸焉舊有  
 倉歸附以來廢為瓦礫昭信校尉浙西鹽使阿散前任  
 松江府判官有明敏稱閱十年來蒞是司至之日首以  
 倉為急務乃率僚吏即故基峙屋八十一楹既成求予  
 記予謂修廊繆迴簷角翔舞重欂櫨屬連演迤此倉  
 之營造也漉沙結白熬波出素水裂電碎眩轉的矚此  
 倉之儲蓄也風帆海艘隨潮下上富商巨賈雲合雨集  
 此倉之發運也此固為美猶恐未之盡領斯倉者或邪  
 溝暗港私販旁午私日多而官日少可不思所屏息乎  
 或倉利綱兵姦利相視混晶英而雜偽惡可不視所核

視乎或上虧國用下闕民食利未興而害未除可不思所建白乎昔杜中立為義武節度使歲輓鹽海濱人甚苦之置數百人具舟以載民不勞而軍食足當時號為飛雪將劉忠肅責監衡州鹽倉人皆食善鹽且儲其羨以為償弊減什七八父老目為學士鹽今昭信建立若此則中立之才可見矣至於處監當之責任均輸之賢如忠肅者尤當選其人昭信生西域久仕華夏趣向甚可嘉故併書以告至元癸巳清明日朝列大夫松江府知府兼勸農事鄆張之翰記并書篆昭信校尉浙西鹽使阿散將仕郎浙西鹽司副使趙仲良將仕佐郎浙西監司判官張明吏目史彬同立

宋北鹽倉在今府西北三十步

宋支鹽倉在今府西北三十五步

宋般運倉在張涇堰乾道八年置主運浦東塲鹽

元際留倉在今府西南五百四十步舊造船塲按圖在太

平橋西北則今中所演武塲是也大德間嘗遷於府東

南八百步籍入朱張地後為軍儲東倉今為織染局局

東有隙地俗猶呼倉基

元陸居仁松江府達魯花赤沙侯部糧政績記松江府倉二左曰際留貯華亭稟右曰太平貯上海稟歲以石計際留四十萬二千一百有奇太平三十七萬四千七百有奇為石富浩貪者覲之恒歲自府史縣胥下至皂隸遊食之氓爭賂入倉為剽竊計監總者利其賂錄入而縱其暴狠饕鼠齧民飲抑不得愬積習既貫取者若當然予者若宜然恬不為異珠玉之惜不供沙礫之踐力耕者無贏游食者克羨歲益久弊益滋雖廉於監者不能革而極也至正十一年朝列大夫沙侯來為府達魯花赤蒞政及冬領左倉事審而知其弊斥其賂禁其苛歷三年而禁益嚴處益當是年春刑部侍郎奉中書命來糴五萬為軍儲浙省亦遣使來糴五萬有七千供兵食令下侯即驗力分配率五日而糧集府之庶務倉務為十九侯戴星出入未嘗有倦色惜稟而子民戒

貪而禁暴終始如一日未嘗有變志初糴命尊至侯度其繁重選府史沈德輝副倉事縣胥錢裕典攢事懼力之不給也又選宋元善同攢事戒之曰農無恒產賴公田以為耕自上農夫家不過三十畝歲豐事育有不給一遭凶歉飢饉流離載道其忍苛取乎糴糧雖出富室然軍需無恒力亦疲薊又恐濫收乎其平之勿使有咨對諸史奉命唯謹受歲租若降糴正桌外不敢樣粒妄取而輸者亦無勺侖妄費農德侯爭門先輸隘不能入至有顛而仆者侯戒勿亟令循次以進輸者始定諸史感侯化受桌亦平允攢裕因扁其寓廡曰思平相與自勉也既復具穹石倉左相率詣走請記其蹟走曰甚哉侯政之得民也亦甚哉人心之從化也昔倉之史胥有德其監總者以能容已也今禁其苛而反德侯於以見人心天理之公有不可泯也傳曰公則悅此其驗歟以侯之心公於愛民而廉於自守化及史胥皆知以公廉為心者固侯之賢若副若攢感侯之化而同歸於公且廉者亦史胥之賢也是均可書故從其請而述其蹟庶後之職倉事者有所勸云至正十四年七月前鄉貢進士陸居仁記 吳郡錢達書篆 倉

監支納吾都蠻 大史林補等立石

元太平倉宋濟民倉也初建於烏泥涇以受上海漕粟至

順二年遷于此仍榜舊名

元張夔應烏泥涇太平倉記 欽惟皇上聖神文武文奄有四海車書混一古所未見猗歟盛哉上海為海道要津東南通閩越西北距江淮曩屬秀之華亭今邑陞為府錫名松江仍隸焉至元辛巳國家調度參知政事鄭公董師海上以糧道為第一務運漕轉輸莫此為便相地立倉議待糧二十萬石欲擇材鳩工念事大費夥非咄嗟可辦訪謀露廩會近境故官張俊遇有宅一區為屋四百有九園館一十五地為步三萬五千四百八十四環屋背水規模廣表氣象雄偉俊遇知參政公有經世濟時之志無勞民動眾之心慨然以園宅自售宣司呈省省聞于朝獲旨於公帑給寶鈔九萬兩以酬其直省遇就俾俊遇改營分間架築垣墻以畢能事由初暨末曾無輿木輦石之勞兵餉民租公私兩得俊遇雖售已業為公廩然亦隱寓體國之忠似可嘉尚因命名曰太平倉烏泥涇其故里也自今以始歲其有將見歌豐年高廩之詩為既濟太平之驗雖然享已成之效又當



為可遠之思郡太守必有任其責者秦侯居中被省檄  
公出未暇總判戴公剛來攝郡事以古人一日必葺為  
心亟求完備公餘謀諸幕府而命僕曰倉既成矣猶有  
闕焉君為我記其事勒之堅珉庶幾有以傳將來垂不  
朽僕忝文學掾長有命屬何敢辭敬據郡案牘歲川事  
實顛末為之記至若鑿地成渠引舟運息肩賴縣佐車  
君仲與有力焉僕故併及之至元乙酉九月既望儒學  
教授張夢應記并書 首領官提領案牘薛守智 將  
任郎知事王端 承直郎嘉興路總  
管府判官權松江府事戴剛立石

元際留西舍在今府西三里至正初建鹽倉尋罷十二年

監府哈散沙更修以受縣桌陸居仁記 前志云濟民舍嘗改為際留西

舍按居仁沙侯政績記松江舍二左曰際留受華亭桌  
右曰太平受上海桌則是太平與際留西舍一也新志  
又稱太平西舍為守禦千戶宅則今  
合掌橋西費千戶所居是也 顧志

驛傳

凡府有驛有遞運所松江非孔道故去驛而設遞運以  
從省也亭以將迎舖以傳命牘書之以其類也 顧志

雲間遞運所在府城谷陽門外澤潤橋之西古名雲間館  
又曰雲間驛前志有西湖官驛又曰館驛在府東偏益  
別署也元遷驛於府治後改為松江站以舊驛為在城  
稅司明洪武初復建於此仍舊名雲間驛三十年改為  
遞運所祇待委積仍如驛例舊風涇上海各有驛至是  
俱省雲間驛樓久廢正德二年撤遞運所門為樓而門  
其下者知府金洪也 顧志

雲間遞運所設大使一員祇謁往來而河下水嘗淺涸不便駐舟故於慶雲橋之西復設館驛以待巡使者駐節俗因謂之外館驛而謂遞運所曰內館驛云

陳志

元陸居仁松江站館夫義役田記里人陳君達之以好義聞於鄉有年一旦踵門謂予曰民無貴賤凡執役於公者罔不艱厥役為尤者其館守之隸人歟隸人役於丁眾下產戶下產戶率寬禍靡練隸事且日以力食自給役之無以稱使者使令祇督責是負生計是荒耳雖轉貲素習守館者代若役然名繫有司役未終終無一日寧其業是以細民咸疾首斯役役以季為易歲凡四易焉遇當易鄉隅胥卒乘勢藉名騷無寧宇比年益繁十室九罄予憫民力之不紓又惟隸役之不可乏因與父老謀曰以里正富民之役猶有津田以優之館夫細民之役也反無優其力者於義安乎吾將援津田例首捐已貲率鄉之好義鳩券買租給雇役之費而無厲斯民爾曹幸相吾成僉曰唯於是首捐中統鈔千五百緡凡鄉之好義樂施者必躬詣募率共得萬有六千五

百有六緡置田租二百四十一石有奇令父老毀民章以事陳有司歲以所買租約除二十有二石備苗稅課程之需餘租二百一十九石有奇擇膺館人之習守隸者每夫月給一石俾專是役庶驛夫有恒養細民無恒憂誠胥利也初松江二驛在城隸六夫風涇鎮隸四夫厥後司站者妄以在城行役繁多加四名為十有六夫以今驗之松江居僻壤使者所至視他郡恒少隸人率多曠日風涇使者經食無留宿供給用是站裁二夫存十有二名歲給計百四十有石以所餘備旱潦之虞綽乎有餘裕矣有司然所請公選站戶之敦信者輔之呂君與司契券與租之出內焉然懼歲月浸久司者易而田租存議勒堅珉以示遠繼子勇于義者盍為我記之余曰豪傑之士學為時用者莫不以利澤及人為先務求其能澤者寡矣達之是舉乃能輟已貲澤一鄉□□□□非學問之力何以加於此哉余素重陳之為人□□□之義因述其槩以遺之後之承會計者雖欲利其民而遺此能無忸怩乎元統己亥夏四月前鄉貢進士陸居仁記元陸居仁松江站均役記有銘監松江郡沙侯蒞政之明年南鄉儒生謝夢生來告曰夢生族有館粥田役

於站役免苗苗有贏則役以館使曰祇待庫松江二站居風淫者館過使在城館留使過使無宿膳易供留使無常期費殊浩富強家多賂所司隱苗不盡役及役又隱日不盡直又避重居風淫寡力不能賄苗盡在役數及役又盡日數所役日又盡館在城留使故優愈優煩愈煩役之不均莫此為甚吾族儒者薄苗盡祇在城館歲餘七十日年既深族之貲盡入庫費室皆縣罄矣日哀愬有司有司禁於賂聽若罔聞至正辛卯侯蒞事公動廉明夢生知其能恤民隱也遂愬之侯果明決知廼弊因覈郡之役站盡出隱苗若干石命府史李篤吳友諒計苗以分日二史承戒敷所役苗五石直館一日日五一更次風淫在城更互以均其力故富強不得逃優館而吾族損日數者幾半又風淫日多為始稍蘓息焉德其功無以報所私具堅珉敢請文以著其績于幸母卻走日守令之責有六賦役其一也賦役之日不一祇待其一也侯蒞事期月於六事之績罔一不備且善子欲以祇待額記之吾恐遺其善之衆也試以其槩語子立社學以厚風教考堂課以毓人材學校由是以興省耕而田里無擾省斂而倉庾樂輸農桑由是以成禦姦有方盜賊亡自而發服民以義訟獄亡自而繇邊境告

急軍需亡時侯賦富民富民樂其寬而亡對役貧民貧民德其養而亡咨賦役之均不徒祇待矣和糴之降動萬數共命亡勺餽遺畜積之美不徒常平矣侯於六事為績如此子皆舍而獨思所私吾竊少之且昔之稱循吏者興學如蜀文翁未聞勸耕如龔渤海曉指闢者而獄無囚賦優下民而民不困如何益昌未聞常平羨餘如韋永州古人之於六事難備如此今侯備焉真循吏之最豈祇待一目所能該耶雖然人各懷侯功然後侯得全其功以侯之善民之德之固非止一家一役而足憂主懷報之人豈忘之哉是碑之出踵之者將日至是侯之績有不勝其紀矣然倡厥攸始誼實由生是生者其德侯之郭隗歟矧侯相種也以經綸之才加學問之力宜不以為郡而畫異時考績上上入秉鈞軸措天下如泰山當是時善固有大於今日者走之所述特取其承流宣化不負司牧之托者著以為守令表俾觀民風者有所采太史氏有所錄云爾迺系之銘曰天生烝民克綏惟君於皇民德寄命守臣雲間古郡于吳海濱民以田富田以役貧匪役之貧令之不均維吾沙侯受命戢抑者以信脩焉舊室盜焉陽春惟役有站蠲苗恤艱

苗田有羸膳使羞珍侯之未來羸憂憤憤或盡苗役或  
隱苗真侯既蒞止民瘼是詢迺均斯役以笑易呻貧者  
德侯愛戴若親豪強戢威畏侯若神侯備六事其心孔  
仁屢言莫終舍言則泯爰據其槩勤諸堅氓百爾來守  
宜紹其勲至正癸巳夏五陸居仁誤并書 朝散大夫  
前臨江路新喻州知州兼勤農事也速達爾篆額 郡  
諸生謝端并  
孫慶生立石

元段天祐寓雲間驛有懷詩 元夕錢塘歸未能玉簫  
誰倚畫樓層涌金門外如銀月何處人家不是燈 城  
上啼鳥起夜闌瑣窻風度落梅寒一  
年端正元宵月可惜匆匆客裏看

### 風涇驛在風涇鎮為江浙往來之衝宋時設今廢


元無名氏風涇驛記 環雲間皆水唯西南塘路可通  
郡故郡以風涇為喉襟蓋出入無不由此至元癸巳南  
省許置驛視公帑一錢莫敢動有鄉之好事者張某及  
近保數巨室來助木瓦之費余與同僚度其地令站官  
陳青創屋宇二間雖未盡輪奐之美館之所須亦畧備  
古者國野之道十里曰廬三十里曰路室五十里曰候

館有飲食有委積皆所以待朝聘之官也今吏是驛者  
賓至旁午固宜奉符蜀數執牘書物展蠲潔之敬致供  
饋之禮勞迎餞別俾盡歡欣而去過是驛者朝慙夕庇  
其可折篙斷牽破舷碎鷓汚敗其室廬廢毀其器用畧  
不顧惜乎起四月十五日畢七月十六日至於規模日  
宏締構日增擅浙右傳舍第一之稱又當埃後來諸君  
姑勒石以  
告厥成

### 西湖官驛臨西湖上故陸氏放鶴灘也有水閣頗稱幽致

#### 今廢

元無名氏題西湖官驛水閣詞 倩綵鸞傳語問陸冢  
兄弟翩翩今歸何處留下文章藏萬壑時作雲烟吞吐  
謾徒倚朱闌窺芳闌外瑁湖誰管領歎先生舊宅僧分  
住天下事盡如許 英雄總被虛名誤覽遺編浩歎寂  
寞一丘寒土惟有春風長來往催却幾多人去但歲歲  
垂楊自舞今日我來懷古後筭後人又以今為古留此  
曲伴鷗鷺 右調賀  
新郎至元十三年作



鶴城書院在普照寺西故縣之別署後以爲驛館明初革  
雲間驛通判洪景德重爲繕理易今名凡賫奉詔勅使  
臣居此今俗猶呼裏館驛

聽鶴亭在今西林寺西舊名谷陽俗呼接官亭古送迎憇  
息之所元元貞三年修易今名至正中府監哈只哈散  
沙繼修益壯左有堂扁曰集英門榜曰駐驛華亭尹劉  
必世溫書志稱其地面瞰大河背負九峰光明敞豁爲  
郡之絕致而又當闐闐輻輳中以是頗爲傍近所侵數  
十年前嘗有以勢規爲已業者存古愛禮之君子尚於  
此而致意云顧志

元劉蒙聽鶴亭記 古者君遣使送之以禮樂謂其遠  
也君以遠而送臣獨不以遠而迎今之制奉命而來者  
皆曰使郡縣率屬迎送無或後者事上之心重也松江  
古華亭邑天朝以其冠浙右而陞之府千里牧寄跡昔  
之邑事有加於是上之人循行撫治常絡繹郵遞走役  
告至告去殆不止使之云耳有司駿奔出郊素無傳館  
往往班荆道周寄跡梵宇至則雜前迎趨去則交向遽  
別視古進退之節幾失之曰余爲郡文學掾侍迎送者  
亦屢一日郡長官顧聯事僚屬而謂曰府若縣幸各就  
治所迺送之地則未暇舊聞有谷陽亭獨不能捐俸以  
築亭於谷陽門之西土木具興不動衆不妨農逮至卒  
事不兩月其飾之文質階之升降垣之塗墍各當其宜  
觀者偉其制之新而喜其成之速也亭東水連於湖湖  
有磧曰候鶴灘或請以聽鶴名焉雖然亭非爲聽鶴也  
議莫敢定中書右丞馬公可而書之遂揭于扁俾余記  
其實因據戴白之言曰斯室不作者久矣今不勞而辦  
美官府之得賢也爰記諸石以明作者之所始府儒學  
教授劉蒙記 將仕郎華亭縣丞魏雲翼書篆 中議  
大夫松江府達魯花赤兼勸農事納速刺丁 奉訓大

夫知松江府兼勸農事掎只 承直郎同知松江府事  
何答納 承務郎松江府判官傅大有 提領案牘侯  
礪范宗

文立

元完澤普化重修聽鶴亭記 雲間直郭西孔道有亭  
翼然臨其陽顏曰聽鶴者郡昔置以爲送御憇息之所  
也上自天子銜命之使暨省若憲若有司凡檄號郡縣  
以至者必郊御之郡之羣有司歲時進賀章奏及使者  
之布命而返與凡僚屬之被命或代而去必郊送之御  
而未至送而未忍決去必於焉以俟以祖且餞及御而  
至必於焉以駐且勞所謂憇息之所也非宏敞曷容以  
稱而舊規褊隘自大德丁酉至於今歷四十有五年未  
有圖展而新者至正改元亞中大夫哈只公來監是邦  
蒞政慈祥以禮率下民俗胥變遠近洽和爰相是亭宜  
更舊觀謀之太守守議協從諗之羣僚羣謀僉同詢之  
耆民民情嚮風於是資者給財力者效庸未數月告完  
廓焉軒墀窈焉室堂司關有廬庖厠畢具視舊觀加克  
拓矣官不知費民不知擾監收喜之借予來登謂予曰  
子科第人也且世以祖勲居是邦其知故實審時俗矣  
盍爲我記之予辭不獲已因告之曰國朝凡天下郡縣

於孔道送御之地必置館宇猶古者國野之道有廬宿  
路室候館以尊來使眷去賓也世之仕者視已解猶傳  
舍且不恤况勞送之暨至者又孰加之意乎今侯視官  
解如已解則能視官事如家事能推是而往自官舍而  
民舍使各有寧宇則善政之實又何言耶方侯葺茲亭  
而時和及成而歲用登是尤可書也於是述其槩俾我  
于亭之左庶觀風者有采焉至正三年正月賜同進士  
出身徵仕郎汴梁路鄆城縣達魯花赤完澤溥化記

唐胡曾詩

陸機西歿洛陽城吳國春風草

又青惆悵月中

千歲鶴夜來猶爲嘆華亭

元陳孚望詩

燕子穿簾水荇開故家猶有  
讀書堆平生雙耳松風裏又向華亭聽鶴來

明謝琛聽鶴亭送客詩

溪亭尊酒對芳春魚鳥多情  
亦自親十載杏園花下客一時驄馬望中人江南佳麗

聞詩句吳下繁華見病民孤鶴數聲清興  
發欲排閭闔叫楓宸 時松江連歲大饑

水雲亭在秀野橋北凡輜軒使乘大舟而來內地潮水枯

涸卽止於此今稱爲接官亭

問俗亭在雲間第一橋南華亭昔隸秀州此地及風涇驛  
為往來要衝今惟江浙巡鹺御史往來飲餞駐泊於此  
上海驛今為公館府官行縣則蒞焉

上海觀瀾亭俗名接官亭在坊浜北

府前總舖在府東前志稱郡治東偏有近民亭宋華亭知  
縣楊瑾建元時為館驛疑總舖即其地也

東路至上海縣又東至中後所十一舖

車墩舖

胡婆舖

紫岡舖

八尺舖

華涇舖

烏涇舖

龍華舖

上海縣前舖

周八舖

楊灰舖

南滙蕭千戶所前舖

西路至嘉善縣界六舖

吉陽舖

斜塘舖

滕港舖

西塘灣舖

陳涇舖

風涇舖

南路至金山衛東南至中前所六舖

蓮花朶舖

楊胥舖

金山衛前舖

漕涇舖

袁浦鋪

青村鋪

北路至青浦縣七鋪

通波鋪

興福鋪

黃蠻涇鋪

北簞山鋪

郊店鋪

青龍鋪

艾祈鋪

西北由青浦縣至崑山縣界五鋪

白鶴鋪

浦闕鋪

徐公鋪



江橋鋪

綠葭浜鋪

已上凡三十六鋪每鋪九里

按嘉禾志元制松江府急遞鋪一十有四自風涇東接泥滑橋為十二里泥滑橋東接朱涇朱涇東接九里菴九里菴東接李塔滙李塔東接吉陽滙皆為九里吉陽東接府前為十五里府前東接張涇為十八里張涇東接盤龍為十五里盤龍東接新墳新墳東接錢墳皆十

七里錢墳東接龍華十八里龍華東接淡井淡井東接



松江府志卷之二十二終

文政重刊





松江府志卷之二十三

松江府志

地理

松江府志卷之二十三

松江府志卷之二十三

松江府志卷之二十三

松江府志卷之二十三

松江府志卷之二十三

松江府志卷之二十三

松江府志卷之二十三

十三